

明史藁

列傳自百八十九
至百九十一
七十六

275
275





		二	漢
		二	書
		三	門
八	九	一	類
〇	〇	〇	
冊	架	函	號


庫		文		閣		內	
二	二	二	漢				
一	一	一	書				
三	三	三					
〇	〇	〇					
架	冊	號	類				

內閣文庫			
番號	漢	2231	
冊數	80 (76)		
函號	281	40	

新刊納本







明史藁

列傳第一百八十九

光祿大夫

經筵講官明史總裁戶部尙書加七級臣王鴻緒奉

敕編撰

雲南上司三

緬甸

二宣慰司

干崖

宣撫

潞江

者樂甸

茶山

孟璉

卽猛臉

里麻

鈕兀

東倘

瓦甸

促瓦

散金

木邦

附孟密安撫司

孟養

車里

老撾

八百

二宣慰司



17360

緬甸在雲南極邊地。古未通中國。其部落有五城。元至元中。屢討之。乃歸附。後於蒲甘緬王城。置邦牙等處宣慰使司。太祖初卽位。遣使諭之。不能達而返。二十六年三月。八百國使人洪都入貢。因言緬國近其邊。以地遠不能自達。帝乃令西平侯沐春遣使至八百國王所諭意。於是緬國始遣其臣板南速刺至進方物。命宴勞之。賜綺帛有差。二十七年六月。置緬中宣慰使司。以土官卜刺浪爲宣慰使。賜其使二十人。鈔錠羅綺布匹有差。二十八年。緬國卜刺浪遣使桑乞刺查朝貢方物。因言百夷思倫發屢出兵侵奪其境土。命遣使諭之。二十九年。緬國復來訴。因遣行人李思聰錢古訓諭緬及百夷各罷兵守土。緬國聞命。思倫發亦奉詔罷兵。適百夷部長

刀幹孟叛。逐思倫發。以故事得已。永樂元年。緬甸頭目那羅塢遣其屬郎尋蹇來朝貢方物。初西平侯沐晟遣鎮撫鄧伯通等撫諭之。至是來朝。且言緬雖遐裔。悉願臣屬中國。而道經木邦孟養。多爲阻遏。乞命以職賜冠服印章。將來憑仗天威。歲効職貢。庶免欺陵。帝命設緬甸宣慰使司。以那羅塢爲宣慰使。遣使賜冠帶印章。二年三月。遣內官張勤頒賜緬甸。四月。緬甸遣人來貢。五月。遣員外郎左洋使八百國。并賜緬甸冠帶襲衣。五年四月。緬甸土官那羅塢等遣其屬洛霞等詣闕貢方物謝罪。先是孟養宣慰使刀木旦與夏里相仇殺。而那羅塢乘釁發兵劫之。殺刀木旦及其長子思樂發。掠其人口牛馬。遂據其地。事聞。詔行人張洪等齎敕諭責之。那羅

增懼遂歸其境土及所掠遣人詣闕謝帝諭禮部曰蠻既服
辜其釋不問仍給以信符令三年一朝貢初卜刺浪分其地
使長子那羅增管大甸次子馬者速管小甸卜刺浪死那羅
增蓋收馬者速土地人民馬者速往依速覩嵩上官板洋爲
贅婿至是復居小甸遣人來朝且訴其情敕諭那羅增兄弟
和好如初毋干天討六年五月緬甸宣慰使那羅增等遣頭
目洛霞等貢馬方物謝罪并謝賜金牌信符恩皆予賜七年
那羅增使來復遣中官雲仙等齎敕賜以金織文綺紗羅如
麓川十二年那羅增遣刺牙詣闕言爲木邦所侵掠帝以那
羅增素強橫遣人諭之使修好鄰境各守疆界洪熙元年遣
內官段忠徐亮以卽位詔諭緬甸宣德元年遣使往諭雲南

土官賜緬甸錦綺有差二年以緬甸大頭目莽得刺爲緬甸
宣慰使初緬甸宣慰使新加斯與木邦仇殺而死子弟皆潰
散緬甸頭目耆老共推莽得刺權理請襲許之八年莽得刺
遣人來貢遣內官雲仙齎敕賜之并諭其保境勿侵木邦地
正統六年給緬甸信符金牌各一時麓川思任發叛將討之
命緬甸調兵待七年思任發兵敗過金沙江走孟廣緬甸宣
慰卜刺當起兵夾攻之帝諭木邦緬甸能擒賊首獻者予以
麓川地八年總督尚書王驥奏緬甸宣慰使馬哈省以速刺
等稱已擒獲思任發比覽緬書切切以麓川分地爲言臣以
論功行賞自國家成憲已諭其將思任發解京恩賞自不爾
吝也時緬甸已囚思任發於阿瓦城思任發之子思機發復

據麓川爲亂。勢復熾。緬甸恐獻思任發未必得地。徒爲思機發所仇。屢檄不報。欲大軍殺思機發分地。乃出思任發朝命。遂有并征緬甸之論。是時大師已集騰衝。緬甸宣慰遣人致書。期以今冬會木邦人馬。送思任發。至貢章。交官軍。驥與剋期。遣指揮李儀等領精兵爲前鋒。通南牙山路。擣貢章。而緬人獻思任發者。竟不至。九年驥駐師江上。而緬用大金樓船。載賊渠往來江上。覘官軍虛實。驥知緬終不肯出賊。且以麓川未平。緬難不可復作。乃率總兵官蔣貴等。潛焚其舟數百。緬人潰。驥乃班師。於是總兵官沐昂奏。緬甸恃其僻險。黨蔽逆賊。應加兵。恐煩師衆。滇方連年征進。財力困弊。旱澇相仍。糧餉亦匱。未可輕舉。臣已遣人諭緬禍福。俾獻賊首。緬宜聽

從。十一年木邦宣慰罕蓋法。緬甸故宣慰子馬哈省以速刺。遣刀路猛等。偕千戶王政等。獻思任發首。及諸俘馘。至京。并貢金銀什器象牙土錦等物。帝命馬哈省以速刺爲宣慰使。賜路猛等宴。并綵幣有差。俾齎敕及綵幣。褒賜兩宣慰。仍給賜馬哈省以速刺冠帶印信。未幾以速刺奏求孟養戛里地。且請大軍亟滅思機發兄弟。而已出兵爲助。帝諭以思機發可不戰擒。宜卽滅賊。以來分地。勿爲他人得也。景泰二年八月。賜緬甸宣慰使陰文金牌信符。時緬甸宣慰以速刺已擒獲思機發。久不卽獻。又將思卜發。放回孟養。至是來索地。左參將胡誌遣人以銀戛等處地方與之。乃送思機發及其妻孥。至金沙江。歸於誌。獻京師。帝以思卜發旣遠遁。不必窮追。

仍加賞錦綺絲幣。降敕褒獎。成化七年。鎮守錢能奏。緬甸宣慰奏稱。貢章孟養二地。舊為所轄。欲爭據之。尋奉旨往勘。貢章係木邦隴川分治。孟養係思洪發所掌。非緬甸地。難從所請。令雲南守臣傳飭諸部。而緬甸以所求孟養貢章地不許。復執奏許地。乃前朝明旨。而貢章乃緬甸朝貢駐泊必由之途。乞與緬甸。又以金齒軍餘李讓。乞令為冠帶把事。以備任使。兵部尚書余子俊等。以為思洪發不聞有過。豈可奪其土地。李讓中國人。而與為把事。亦非體。宜勿許。帝命兵部諭其使。以朝廷一視同仁。無間遠邇。凡經赦不再犯者。俱不復治。孟養貢章。是爾朝貢所由。當飭邊臣。往諭思洪發。以通道往來。不得阻遏。李讓聽該管官司專遣。其體朕意。勿復多望。弘

治元年。緬甸來貢。且言安南侵其邊境。二年。遣編修劉戩。諭安南罷兵。然緬地鄰孟養。而孟養以緬先執。思任發於朝也。故怨緬。嘉靖初。思陸子思倫。糾木邦及孟密。擊破緬。殺宣慰莽紀。歲并其妻子。分據其地。緬甸訴於朝。不報。六年。始命永昌知府嚴時泰。衛指揮王訓。往勘。思倫夜縱兵鼓譟。焚驛舍。殺齋金牌千戶曹義。時泰倉皇遁。乃別立土舍莽卜信。守之而去。值安鳳之亂。不暇究其事。莽紀歲有子名瑞體。少奔匿洞吾母家。其酋養為已子。既長。有其地。洞吾之南。有古喇濱海。與佛郎機鄰。古喇酋兄弟爭立。瑞體和解之。因德瑞體。爭割馬革地為獻。受其約束。號瑞體為噠喇。瑞體乃舉眾。絕古喇糧道。殺其兄弟。盡奪其地。諸蠻皆畏服之。當是時。滅緬者。

木邦孟養而與緬相抗者孟密也。孟密思漢子嫡庶紛爭。訴於瑞體。瑞體乃納思漢子思琢爲壻。改名思忠。遣歸孟密。而奪其兄思宋印。因假途攻孟養。及迤西諸蠻。以復前仇。又使其黨卓吉。侵奪孟養境。後卓吉爲思真壻。猛乃頭目。別混所殺。瑞體怒。自將攻別混父子。擒之。仍招致隴川干崖南甸諸土官。欲入寇。旣覘知有備。又慮他蠻襲其後。乃遁歸。於是鎮巡官沐朝弼等。上其事。兵部覆。荒服之外。治以不治。嗟喇已畏威遠遁。傳諭諸蠻。不許交通結納。詔可。時嘉靖之三十九年也。時木邦土舍罕拔。求襲不得。怒投於緬。潞江宣撫線貴。聞之。亦入緬。瑞體自以起孤微。有兵衆。威加諸部。而中國復禁絕之。遂萌自王之志。日窺中國虛實。謀內侵。乃命線貴。趣

召隴川多士寧。士寧聚兵爲堆。言中國廣大。誠勿妄動。瑞體意稍寢。未幾士寧爲其下岳鳳所殺。干崖宣撫刀怕舉亦死。罕拔乃請瑞體入干崖。干崖舉。則隴川可坐定也。瑞體子應裏。桀黠多智。言於瑞體曰。隴川干崖雖無主。遠難猝取。孟養思箇近在肘腋。又吾世仇。萬一乘虛順流下禍。不淺。瑞體深然之。因借木邦兵一萬。取干崖。而自率兵侵孟養。旣至。屢爲思箇所敗。思箇亦退保孟倫。相持久而隴川書記岳鳳。欺其主幼。私齎重賂投緬。結爲父子。蠻莫土目思哲亦迎附。瑞體乃調緬兵萬餘。出入於迤西界上。以牽制思箇。復徵木邦罕拔兵。會岳鳳於隴川。襲孟密。萬曆元年。緬兵至隴川。入之。岳鳳遂盡殺士寧妻子族屬。受緬僞命。據隴川爲宣撫。乃與罕

拔思哲盟。必執思渾下孟密。奉瑞體以拒中國。偽爲錦囊象函。貝葉緬文。稱西南金樓白象主莽噠喇弄王書。報天皇帝。書中嫚辭。不忍聞。罕拔又爲緬招干崖。許刀怕文代襲其兄職。怕文拒之。與戰。適瑞體遣子應裏。率賊二十萬。分戍隴干間。以其兵驟臨之。怕文潰奔永昌。遂取干崖印。付拔妹罕氏。以女官攝宣撫臣緬。而召蓋達副使刀思管。雷弄。經歷廖元相佐之。同守干崖。以防中國。於是木邦蠻莫隴川干崖諸蠻。俱已附緬。獨孟養未下。金騰副使許天琦。遣指揮侯度。持檄招諭孟養。思箇受檄。益拒緬。緬大發兵攻之。思箇告急。會天琦卒。署事副使羅汝芳受事。犒思箇使。令先歸待援。且許以世襲。遂調漢土兵馬。躡至騰越。思箇聞。援兵至。喜。令土目烏

祿喇送等。領萬餘兵。絕緬糧道於阿瓦寨。且導大兵伏戛撒。誘緬兵深入。截其歸路。自率蠻卒衝其前。而令援兵自隴川尾擊之。緬兵旣大敗。又糧絕。屠象馬餉兵。不給。死者山積。瑞體窘甚。會有陳於巡撫。言生事不便者。巡撫王凝立馳止之。汝芳聞。檄忿甚。然無可如何。思箇待援不至。岳鳳偵知之。集隴川兵二千。兼程進。導瑞體由間道遁去。思箇追擊之。緬兵大傷。當是時。幾獲瑞體。六年。廷議遣使至孟養。俾還所俘緬兵象。并賚以金帛。好言慰諭之。瑞體不謝。七年。永昌千戶辛鳳。奉使買象於孟密。思忠執鳳送緬。緬遣回。是年。緬復攻孟養。報戛撒之怨。思箇以無援。敗奔將之騰越。中途爲其下所執。送瑞體殺之。盡并孟養地。八年。巡撫饒仁侃遣人招緬。緬

不應十年。岳鳳領緬兵襲破干崖。奪罕氏印俘之。俄瑞體死。子應裏嗣。岳鳳嗾應裏殺罕拔。盡俘其衆歸緬。鳳又說應裏以大兵壓境。自赴參谷。起象兵數十萬。分道內侵。於是時雷弄盞達南甸。干崖木邦老姚思甸皆爲所破。十一年。焚掠施甸。寇順寧。鳳子曩烏領衆六萬。突至孟淋寨。指揮吳繼勳與千戶祁維垣死之。又破盞達。副使刁思定求救不得。城破。妻子族屬皆盡。且窺騰衝永昌大理蒙化景東鎮沅諸郡。巡撫劉世曾請以南京坐營中軍劉綎爲騰越遊擊。移武靖參將鄧子龍爲永昌參將。各提兵五千赴勦。并調諸土軍應援。緬亦合兵聚姚關。綎與子龍大破之於攀枝花地。乘勝追擊。自十年十月。至十一年四月。斬首萬餘。復率兵出隴川孟密直

抵阿瓦。緬酋猛勾詣綎降。勾瑞體弟也。應裏乃以子思斗守阿瓦。是時岳鳳知緬勢不足恃。而大軍環攻之。勢危急。遂降。伏死京師。詳隴川傳。時諸部蠻多視鳳爲向背。緬亦倚鳳爲心腹。鳳旣降。諸部俱殺緬使來歸。旣聞鳳擒被誅。諸部旋復解散。陰附於緬。應裏復披猖。攻孟養蠻莫。聲言復仇。時副使李材備兵騰衝。遣兵援之。戰於遮浪。大破其象陣。生擒五千餘人。先是猛哈思化投緬。復進據蠻莫材。遣人招之。思化降。十九年。應裏復率緬兵圍蠻莫。思化告急。時天暑。官軍行不前。裨將萬國春夜馳至。多設火炬爲疑兵。緬人退。追敗其衆。二十二年。巡撫陳用賓築八關於騰衝。列兵留戍。募人至暹羅。約夾攻緬。緬初以猛卯多俺爲嚮導。寇東路。至是遣木邦

罕欽擒多俺殺之遂築平麓於猛卯大興屯田是年緬帥思仁寇蠻莫敗之斬其渠丙測二十三年十二月應裏託孟璉孟良二土司求朝貢致方物鎮巡以聞朝議令原差官黎景桂等齎銀幣賜之至境不受詔以緬酋貢獻原無有葉文專使景桂首事貪功納侮下於理三十一年阿瓦雍罕木邦罕拔子罕葢俱入貢緬勢頓衰而暹羅得楞復連歲攻緬殺緬長子莽機搥古喇殘破自此不敢內犯然諸近緬部先後附緬如初至崇禎末蠻莫思縣爲緬屬守曩木河明叵黔國公沐木波等走蠻莫思縣使告緬緬使人迎之且傳語述萬曆時事并出神宗壘書索今篆合之以爲僞天波出已先所頒印相比無差始服蓋自天啓後緬絕貢職至此無可考驗云

干崖舊名干賴賧夷人居之東北接南甸西接隴川有平川衆岡境內甚熱四時皆蠶以其絲織五色土錦充貢元中統初內附至元中置鎮西路軍民總管府領三甸洪武十五年改鎮西府永樂元年正月設干崖長官司二年頒給信符金字紅牌於干崖并賜冠服三年干崖長官司長官曩歡遣頭目奉表貢馬犀象金銀器皿謝恩賜鈔幣五年設古刺驛隸金齒干崖長官司長官曩歡遣子刀思曩來朝貢象馬金銀器皿方物賜賚如例自是三年每來朝貢不絕宣德六年改干崖長官司隸雲南都司時長官刀弄孟奏乞援大侯長官司例陞干崖爲州又奏其地近雲南都司而歲納差發銀於金齒衛路遠乞改隸雲南都司而輸銀於布政司爲便帝問

吏部大侯何以陞州對曰以歲納差發銀多故陞帝以祖宗設置已定不可易但可改隸雲南都司及納銀於布政司以便之正統三年命干崖長官司仍隸金齒軍民指揮使司六年陞干崖副長官刁怕便爲長官司賜綵幣六表裏初怕便爲思任發所拘脫身歸順其家屬又皆被害後屢立功總兵官沐昂請褒恤之故有是命九年陞干崖長官司爲干崖宣撫司以長官刁怕便爲宣撫副長官劉英爲同知從總督王驥請也天順二年命故土官同知劉英子晟襲職陞刁思忠爲干崖宣撫司副使弘治三年干崖土舍刁怕愈欺其姪刁怕落幼將謀奪宗蠻衆不服遂起兵相攻劫去宣撫司印者四年按察司副使林俊因他事過其地知之遂同參將沐詳

等移文往諭始釋兵歸印事聞帝責鎮巡官不以時奏報宜罪姑宥七年時議征木邦命干崖預爲兵備既思陸兵至遂取道干崖而還嘉靖三十九年緬甸莽瑞體叛招干崖諸土官入寇既干崖復與南甸木邦相仇殺萬曆初宣撫刁怕舉死木邦遂引緬兵入干崖怕舉妻罕氏木邦宣慰罕拔妹也拔旣叛附緬因召怕舉弟怕文令襲兄職以臣緬且以妹許之怕文不受與戰緬兵十萬驟臨怕文潰奔永昌罕拔遂取干崖印付罕氏而名蓋達副使刁思管雷弄經歷廖元同守干崖十年隴川岳鳳領緬兵襲破干崖奪土婦罕氏印俘之十一年游擊劉綎破隴川鳳乞降綎責追干崖印已印竟不得而干崖部衆自相承代亦莫得而考云

潞江地在永昌騰越之間。南負高崙山。北臨潞江。爲官道咽喉。地多瘴癘。蠻名怒江甸。至元間。隸柔遠路。永樂元年。內附。設潞江長官司。其地舊屬麓川平緬。西平侯奏。其地廣人稠。宜設長官司治之。二年。頒給信符及金字紅牌於潞江。九年。潞江長官司曩璧遣子維羅法貢馬方物。賜鈔幣。尋陞潞江爲安撫司。是年。潞江安撫曩璧來朝。貢象馬金銀器謝恩。賜鈔幣遣還。宣德元年六月。曩璧遣子刀門法來朝貢馬。以潞江安撫司隸雲南布政司。初。潞江與灣甸同爲長官司。屬金齒。永樂間。陞灣甸爲州。隸雲南布政司。潞江亦陞爲安撫司。仍屬金齒。至是。曩璧遣子入貢。奏乞改隸爲便。故有是命。九月。遣中官雲仙齎敕及綺幣賜曩璧。二年。黔國公沐晟奏。潞

江千夫長刀不浪班叛。歸麓川聚衆。攻劫潞江安撫司。逐安撫曩璧。入金齒。殺招剛。因達硬等七人。劫奪財物。焚毀民居。又據潞江驛。逐驛丞周禮。立寨固守。斷絕道路。蒲欒阿昌諸蠻與之接境。慮相煽爲亂。請發兵討之。帝敕晟與三司熟計之。五年。晟奏刀不浪班已懼罪。盡還其所據地。復歸舊部。輸役如故。乞因而撫之。報可。是年。置雲南廣邑州。時中官雲仙還自雲南。言金齒廣邑寨。本永昌副千戶阿干所居。干嘗奉朝命。招生蒲五千戶向化。今干孫阿都魯。同蒲酋莽塞叔阿類。詣京貢方物。且乞於廣邑置州。使阿都魯代已掌州事。以熟蒲并所招生蒲屬之。兵部請勘實。帝曰。地在邊遠。不必復勘。悉從之。遂以阿都魯爲廣邑州知州。莽塞爲同知。命禮部

鑄印給之。八年改金齒永昌千戶所爲潞江州。隸雲南布政司。以千夫長刀珍罕爲知州。刀不浪班爲同知。置潞江州吏目一員。本州清水關巡檢一員。正統三年改潞江安撫司。仍隸金齒軍民指揮使司。潞江州百夫長仍還永昌千戶所。潞江州知州刀珍罕同知刀不浪班仍充千夫長。從黔國公晟奏也。又革非額新設諸巡檢司。五年麓川叛寇思任發。致番書於雲南總兵官。言始因潞江安撫司線舊法。邀已以報仇。其後線舊法乃誣已爲入寇。帝以麓川素行侵奪潞江孟養諸鄰。今反歸罪以卸過。因諭潞江守邊屬兵。以俟征討。景泰七年。敕諭潞江安撫司線舊法。賜綵幣表裏。并及其妻。命來使線貫等齎回。旣麓川遣部衆奪據潞江。殺傷官軍。潞江遂

爲麓川所削弱。正德十六年。潞江安撫司土官安捧奪其從弟掩莊寨三十八所。掩屢訟於官不報。捧遂集蠻兵圍掩寨。縱火屠掠。掩母子妻妾及蠻民男婦死者八十餘人。因據有其地。鎮巡聞狀。乃統官軍誘執之。捧尋死於獄。帝命仍戮屍棄市。其子詔及黨與皆斬。天啓間有線世祿者。繼襲安撫。南甸宣撫司。舊名南宋。在騰越南半箇山下。其山巔北多霜雪。南則炎瘴如烝。元置南甸路軍民總管府。領三甸。洪武十五年。改南甸府。永樂十一年。改南甸州。隸布政司。宣德三年。雲南三司奏。麓川占奪南甸州地。請發兵問罪。帝爲特敕思機發。旣黔國公沐晟亦以爲言。帝仍不許加兵。五年六月。南甸州奏。先被麓川宣慰司奪其地。賴朝廷威力復之。若不置

官司以正疆界。恐侵奪未厭。乞於木縛雷傍哈丘隴磨孟倫四處置巡檢司以鎮之。帝命吏部除官。八年南甸州又奏。其州與麓川接境。舊二百夫長。在騰衝千戶所。時賴邦哈等處亦令軍民兼守。後麓川宣慰侵據本州境土。不守者十餘年。今蒙朝廷敕諭。麓川還所侵地。竊恐再見侵據。又慮百姓逃移。乞於本州賴邦哈九浪莽孟洞三處各置巡檢司。以土軍楊義趙德趙榮三人為巡檢。命下三司覆勘。咸奏為宜。遂悉授之。正統二年。土官知州刀貢罕奏。麓川思任發奪其所轄羅卜思莊地二百七十八村。乞朝廷遣使齎金牌信符諭之。俾退還所侵地。帝敕黔國公沐晟處置奏聞。九年。陞南甸州為南甸宣撫司。以南甸州知州刀落硬為宣撫。通判劉思

勉為同知。先是總督王驥奏。南甸宜設宣撫司。撫安蠻民。刀落硬從征有功。宜陞任之。故有是命。六年。給南甸宣撫司金牌信符勘合。加敕諭之。十年。免南甸所欠差發銀兩。令安業。後仍前科辦。天順二年。命故宣撫刀落硬子刀落蓋襲職。復置南甸驛驛丞一人。以土人為之。刀落蓋奏。南寧伯毛勝騰衝千戶所千戶蘭愈。占其招八地方寨子田畝。分作莊戶。辦納銀兩米戶等物。逼民逃竄。事下戶部覆奏。請救雲南三司官同巡按詣其地體勘。所占田寨照數退還。毛勝蘭愈治罪從之。成化六年。南甸宣撫遣千夫長額近怕等來朝。貢馬及銀器方物。賜賚有差。仍命齎敕并綵幣歸賜其官及妻。南甸所轄部有羅卜思莊與小隴川皆百夫長之分地。知事謝氏

居。曩宋悶氏居蓋西屬部。直抵金沙江。與迤西地相牙錯。宣撫刀落寧襲兩世絕。後以刀落啓繼。同廖氏兼攝其地。南甸地最廣。司東十五里。曰蠻干。宣撫世居之。其南百里有關。立木爲柵。周一里。曰南牙。甚高。延袤一百餘里。官道經之。上有百梯。蠻人所據。以爲險者也。

茫市。舊曰怒謀。又曰大枯。小枯。在永昌西南四百里。卽唐史所謂茫施蠻也。元中統初內附。至元十三年立茫施路軍民總管府。領二甸。洪武十五年置茫施府。正統七年總兵官沐昂奏。茫市陶孟刀放革。遣人來訴。與叛寇思任發有讐。今思任發已遠遁。其思機發兄弟三人來居麓川者。藍地方願擒之以獻。兵部言。思機發刀放革。先與賊首思任發同惡。

今見勢窮。乃言結蠻。其情謫詐。俱難憑信。宜再降敕諭。刀放革如能去逆効順。則當密調土兵。以助勦。思機發。帝從其言。八年。思機發令其黨涓孟車等來攻茫市。爲官軍所敗。刀放革來降。靖遠伯王驥請設茫市長官司。以陶孟刀放革爲長官。隸金齒軍民指揮使司。成化八年。木邦曩罕弄亂。掠隴川。敕茫市等長官司。整兵以備調遣。萬曆初。長官放福與隴川岳鳳聯姻。導緬寇松坡營。事覺。擒福誅之。立舍目放縉。領司事。轄於隴川。茫市川原廣邈。田土富饒。而人稍脆弱云。者樂甸。本龍馬他郎甸。猛摩之地。名者島。洪武末內附。隸雲南布政司。永樂元年。設者樂甸長官司。改隸雲南都司。時西平侯沐晟言。其地舊屬麓川平緬。而地廣人稠。故有是命。十

八年六月。者樂甸長官刀談來朝貢馬。自是皆以刀氏世領司事。其地山險瘴多。介於鎮沅元江景東間。日事攻戰。鎧械犀利。兵寡而勅。諸部畏憚之。

茶山長官司。永樂二年。頒給信符金字紅牌。於茶山長官司。八年。茶山長官司長官早張遣人貢馬。宣德五年。茶山長官司奏。所隸蠻民。悉居深山。而滇灘當茶山瓦高之衝。寇常出沒。人不能安。通事段勝。頗曉道里。能安人心。乞以勝為巡檢。置司滇灘。從之。

孟璉長官司。永樂四年四月設。時孟璉頭目刀派送。遣子壤罕來言。孟璉舊屬麓川平緬宣慰司。後隸孟定府。而孟定知府刀名扛亦故平緬頭目。素與同儕。難隸管屬。乞改隸。遂設

長官司。隸雲南都司。命刀派送為長官。賜冠帶印章。并賜其子宴。正統四年。麓川思任發反。以兵破孟璉長官司。其長官遂降於麓川。為木邦宣慰罕蓋法所征敗。七年。總督王驥征麓川。招降孟璉長官司亦保等寨。十二月。敕頒賜孟璉長官司故土官刀派罕男派樂等。及其妻綵幣。俱命來使齎與之。以麓川平故也。嘉靖中。孟璉與孟養孟密諸部。相仇殺者數十年。司廢。至萬曆十三年。隴川平。復設猛臉長官司。里麻長官司。永樂六年七月設。隸雲南都司。以刀思放為長官。時思放為里麻招剛。招剛者。故西南蠻官名。思放籍其所治之地來朝。請授職事。統治其民。遂有是命。仍賜印章冠帶。八年。里麻長官司遣頭目貢馬。

鈕兀長官司。宣德八年九月置。鈕兀五隆諸寨在和泥之地。時其酋任者陀比等。朝貢至京。皆奏地遠蠻民蕃多。請設官授職。以總其衆。行在兵部請。并五隆於鈕兀。設鈕兀長官司。從之。遂以任者爲長官。陀比爲副。

東倘長官司。宣德八年置。仍隸緬甸宣慰司。時緬甸宣慰昔得謀欲殺當湯頭目新把的。而奪其地。新把的遣子莽只來朝貢象馬方物。奏乞置司授官。庶免侵殺之患。從之。遂置東倘長官司。命新把的爲長官。東倘地名也。

瓦甸長官司。永樂九年。以隸雲南都司。瓦甸初隸金齒土官刀怕賴言。本司隸金齒遠而去都司近。故改隸焉。宣德八年。置雲南曲石高松坡馬緬三巡檢司。初瓦甸長官司言。曲石

高松坡馬緬。其地山高林茂。寇盜出沒。人民不安。乞置巡檢司。以通事楊資楊中范興爲巡檢。下三司及巡按御史審勘。至是皆以爲便。遂置三巡檢司。命資等爲巡檢。資於曲石。中於高松坡。興於馬緬。正統五年。瓦甸長官司長官早貴。爲思任發所獲。殺其守者十七人。挈家來歸。帝嘉其忠順。命所司褒賞。以早貴爲安撫。賜綵幣四表裏。給受誥命。

促瓦散金二長官司。永樂五年設。隸雲南都司。初其地多屬麓川平緬。宣慰使司土蠻註甸八等來朝。請別設長官司。從之。命註甸八等爲長官。各給印章。

木邦。舊名孟都。一名孟邦。元至元二十六年。立木邦路軍民總管府。領三甸。洪武十五年。平雲南。改爲木邦府。三十五年

七月木邦土官知府罕的法遣頭目刀孟忝等來朝貢馬及金銀器賜鈔幣九月設木邦府以土官罕的法為木邦知府永樂元年八月遣內官楊瑄齋救至雲南諭木邦諸土官二年木邦遣人來朝貢各賜鈔幣時麓川平緬宣慰所遣頭目刀門賴訴木邦數侵其地命西平侯諭之因改木邦府為軍民宣慰使司以知府罕的法為宣慰使賜誥印世襲四年七月帝以罕的法發兵助征八百用命深入攻其江下等十餘寨斬首五百餘級特遣鎮撫張伯恭經歷唐復賜之白金二百兩錦紵絲表裏及其頭目陶孟王甫白金紵絲表裏有差明年罕的法遣使來朝謝恩貢象馬犀牛方物頒賜如例復加賜其母及妻錦綺紗羅又明年故木邦宣慰使罕的法子

罕賓發來朝請襲父職命賜冠服七年七月遣使貢象馬金銀器謝襲職恩又遣刀不荅等奏緬甸宣慰使那羅塔數誘賓發背叛賓發念受國恩不敢從逆若天兵下臨誓當効命帝嘉其忠遣中官徐亮齋救勞之賜白金三千兩錦綺三百表裏祖母母妻織金文綺紗羅各五十匹自是每三年遣使貢象馬不絕十一年八月罕賓發遣頭目刀不荅以所獲緬甸土官那羅塔象馬諸物來獻初那羅塔不遵朝命侵據孟養地罕賓發請以兵討帝許之罕賓發遣頭目刀散孟等攻破緬甸城寨二十餘處多所殺獲因獻其象馬諸物於京師宣德三年木邦故土官宣慰刀罕發從子罕門法請代襲遣中官徐亮齋救及文綺表裏賜之并及祖母母妻有差八年



木邦與麓川緬甸各以爭地故訴於朝。帝命黔國公沐晟并三司巡按公勘。正統三年。敕諭罕門法。大軍臨境。卽率兵會征。五年。總兵官沐昂遣人問道達之。得報。知其祖母美罕板率其孫宣慰罕蓋法。陶孟刀板放等。與叛寇戰於孟定。孟璉地。殺賊部長二十人。斬首三萬餘級。獲馬象器械甚衆。帝嘉其功。特授罕蓋法爲懷遠將軍。封其祖母爲太淑人。賚以金帶綵幣。七年。總督王驥奏。罕蓋法陶孟刀垠送領兵攻麓川板罕貢章等寨。破之。追至孟蒙。獲其孥七人。象十二隻。思任發父子。僅以身免。走金沙江。遁孟廣。帝命指揮陳儀撫勞之。且曰。木邦能自効。生繫賊首。獻其酬。以麓川土地人民。八年。免木邦歲辦金萬四千兩。木邦尋遣人來朝謝恩。并獻所獲

賊曾思任發家屬。帝復賜敕及綵幣表裏。以旌勞之。十一年。罕蓋法及緬甸宣慰卜刺浪。遣陶孟刀路猛千戶王政等。獻思任發首。及諸俘馘。至京。并修貢職。因求麓川地。兵部言。麓川已設隴川宣撫司。其以孟止地給木邦。因特敕諭之。并遣官諭祭其母。以表忠賢。免木邦歲辦銀八錠。俟三年後復輸納。景泰元年。罕蓋法奏。乞隴川界者。闡景線地。未報可。蓋法子罕落法。陶孟思外發。輒領兵據之。隴川宣撫刀奎孟。訴於總兵沐璘。璘遣使至木邦。戒其勿妄動。命歸麓川故地。而以底麻地與之。四年。命罕落法代襲父職。其部族罕措法者。欲推落法叔罕逆襲。乃挾頭目刀板放等。聚衆謀殺落法。落法避於孟更地。遣人赴總兵官言狀。且求救。璘以聞。詔左參將

胡誌調兵往撫諭之。誌至。諭以禍福。罕指法刀板放等皆懼。誌傳其族眾與設盟而還。然罕落法猶避居孟都。凡數年不敢歸。孟都蠻者。近隴川宣撫司地。輒遣蠻兵二百。更番護之。天順元年。鎮守雲南右監丞羅珪奏。罕落法與所部攻殺遣人求援。臣等議委南寧伯毛勝都督胡誌量調官軍相機勦捕。帝以蠻眾自相仇。非犯邊疆。止之。二年。罕落法奏為思坑曩罕弄等所攘殺。乞兵勦除。命總兵官區處以聞。六年。總兵官沐瓚奏。罕落法屢侵隴川地。欲將原撥守貴州兵八千調回防禦。兵部議毋許。詔留其半。成化十年。黔國公沐琮等以木邦所轄蠻婦曩罕弄等。侵掠隴川。攻劫貢章地。以聞。曩罕弄者。故木邦宣慰罕揅法之女。嫁其部長思外發。地有寶井。

屬焉。未幾罕揅法卒。孫罕落法嗣。曩罕弄以尊屬。不樂受其節制。嗾族人與爭。景泰中。叛木邦。逐宣慰據公署。殺掠鄰境。隴川孟養地。威力日盛。自稱天娘子。其子思柄。自稱宣慰。黔國公琮奏。委三司官往撫。曩罕弄為部眾所惑。驕蹇不服。且欲外結交阻兵。威逼木邦。八百諸部。琮等復以聞。於是兵部尚書張鵬等。主用兵。詔命廷臣集議。皆以孟密與木邦。止是挾仇爭奪。竝未侵入邊境。但當撫諭。孟密不可輕易加兵。因敕副都御史程宗起復。馳傳與譯者蘇銓以往。時成化之十八年也。踰年孟密曩罕弄子思柄。遂遣陶孟埽硬等。來朝奏事。貢金寶象牙諸方物。賜宴并衣服綵緞等物。有差。仍令齎救與綵幣。報賜曩罕弄等。九月。孟密奏屢為木邦所擾。乞別



設安撫司。事下兵部尚書張鵬以太監覃平御史程宗撫馭已有成緒。遂命程宗巡撫雲南。仍敕平偕詣金齒。親召曩罕弄母子。并木邦宣慰諭之。其孟密地或仍隸木邦。或別設安撫。具奏以聞。初曩罕弄竊據孟密。遽貳於木邦。畏鄰境諸土官不平。或加之兵。潛遣人從間道抵雲南。至京獻寶石黃金於要路。乞開設治所直隸布政司。兵部爲之覆奏。閣臣萬安欲許之。而劉珣劉吉皆不謂然。以孟密原木邦所轄地。今曩罕弄叛。而請命於朝。若許之。則凡土官聞之。誰不解體。旣而吉以憂去。序班蘇銓受安風旨。以告於宗。宗復奏。曩罕弄與木邦仇殺已久。勢難再合。已撫諭諸蠻。示以朝廷德意。宥其罪惡。開設衙門。令還其所侵土地。皆踴躍奉命。木邦亦已允

服矣。乞遂行之。部臣奏聞。報可。二十年六月。設孟密安撫司。隸布政司。以土婦曩罕弄子思柄爲宣撫。時孟密據寶井之利。資爲結納。而木邦爲孟密所侵。兵力積弱。不能報復。雖屢嘗奏愬其事。竟不得直云。弘治二年。雲南守臣奏孟密安撫司土婦曩罕弄先後占奪木邦地二十七處。又陰誘其頭目放卓孟等叛木邦。木邦不能立。其勢必盡吞而後已。乞敕八百宣慰司。俾與木邦和好。互相救援。亦敕木邦宣慰。收復人心。親愛骨肉。勿使孟密得以乘間誘叛。自致孤弱。如孟密聽諭。方許曩罕弄孫承襲。報可。并敕雲南守臣。親詣金齒。曉諭以聞。復降敕詰責前雲南鎮巡官。所以受賂召侮啓釁者。二年。追論致仕南京工部尚書程宗罪。先是木邦宣慰司頭目

思柄劫占本司地方。宗以右副都御史奉朝命。率序班蘇銓撫諭之。銓受思柄金。給宗爲之奏。設孟密安撫司。卽以思柄爲安撫。銓復喉思柄。焚所占木邦分地孟八等十寨。僞爲狀歸之木邦。實未歸也。思柄由是益橫。至是木邦宣慰罕完法發其事。時宗以尚書致仕。巡按御史請追罪之。獄具。帝以事在革前。命從輕議。六年。雲南守臣奏。孟密侵奪木邦。兵連禍結。垂四十餘年。屢撫屢叛。勢愈猖肆。請調兵討之。事下兵部議。以孟密安撫。初隸布政司。今改隸木邦。政令不一。以致爭殺。或仍如初隸。可息兵。從之。初孟密思揲之復叛木邦也。因其宣慰使罕完法親往。孟乃寨納婦。乘虛襲之。竊據木邦分地二十七處。誘降其頭目高峇落等。又爲思揲聚兵阻路。罕

完法不得還。依孟乃寨者三年。於是巡撫雲南張誥等會奏議。遣都指揮僉事劉鏞。參政毛科等詣孟密。諭思揲猶不服。復遣參政方守。僉事周鳳。署都指揮僉事馬炫。督理糧餉。參議黃東山。副使趙炯。都指揮僉事實俊等。督率隴川南甸。干崖三宣撫司。積糧開路。示以必征之勢。又令漢土官舍耀兵以威之。高峇落等聞之懼。復歸罕完法。思揲欲殺之。罕完法令人調其土兵。合隴川等三宣撫蠻兵。至蠻遮寨共圖之。思揲懼。乃罷兵。木邦人遂從孟乃寨。迎罕完法以歸。至是誥等奏其事。且言賞有功者。兵部議。罕完法雖還木邦。思揲猶未悔罪。必須思揲出見。令與罕完法歃血同盟。歸地。獻叛。自願承襲。不啓爭端。乃可論功行賞。報聞。九年。罕完法及孟密

安撫司土舍思揲各遣陶孟來貢報賜如例初思揲之攻圍蠻遮也木邦宣慰妻求救於孟養思陸思陸者麓川反寇遺孽約非總兵軍符徵發不許過江至是自請効力勦捕思揲而蠻俗相傳孟密素畏思陸之兵因請於鎮巡許之孟養軍未至思揲聞之已解去未幾思揲復構難於是總兵官沐琮遂檄孟養會討尋孟密聽撫與木邦講解孟養思陸既渡江遂留蠻莫不肯退木邦與思陸比謀共取孟密於是滇方之患又在孟養矣時木邦孟密構難自萬安程宗勘處失宜諸酋長紛紛進退中國用兵且數十年嘉靖初思陸子思倫與木邦宣慰罕烈同擊殺緬酋莽紀歲而分其地後莽瑞體強將修怨木邦隆慶二年木邦土舍罕拔告襲有司索賂不爲

請拔怒與弟罕章集兵梗往來道商旅不前而已食鹽亦乏絕乞於緬緬以五千籩餽之拔自是反德緬攜金寶象馬謝之瑞體亦厚報荅之歡甚約爲父子甘心爲用久之瑞體死子應裏入岳鳳言誘拔殺之時萬曆之十一年也拔子進忠守木邦應裏遣弟應龍代之其孽子罕鳳與耿馬舍人罕虔欲擒進忠獻應龍進忠攜妻子內奔虔等追至姚關焚順寧而去十二年官軍破緬於姚關立其子欽欽死其叔罕益約暹羅攻緬緬恨之三十四年緬以三十萬衆圍其城請救於內地不至城陷罕益被擄緬僞立孟密思禮領其衆事聞黜總兵陳賓然木邦遂亾孟密自思揲授安撫傳子思真襲真年至百十歲嘉靖中思烈襲其子思奔思混爭立緬人爲混

殺奔混遂以地附緬改名忠萬曆十二年忠率思化思恨丙測齋偽印來歸遂陞爲宣撫已忠復投緬乃以其母罕烘代領司印居孟密緬攻孟密罕烘率其子思禮從子思仁奔孟廣而孟密遂失十八年緬復攻孟廣罕烘思禮奔隴川思仁丙測奔工回而孟廣又失先是思仁隨罕烘奔孟廣時有甘線姑者思忠妻也思仁乘思忠投緬時烝嫂線姑卽欲妻之而罕烘不許至是罕烘與線姑及線姑子思永皆奔隴川而思仁奔雅蓋率兵象犯隴川欲擄線姑去會隴川有備弗克逞乃同丙測歸緬緬僞署思仁於孟密食其地於是罕烘思禮復奔苾市初孟密寶井朝廷每以嬖臣出鎮司採辦武宗朝錢能最橫至嘉靖隆慶時猶然嘉靖九年有旨採辦時思

真猶在巡按奏以啓戎心不聽萬曆二十年巡撫陳用賓言緬阿瓦擁衆直犯蠻莫其執詞以奉開採使命令殺思正以開道路全滇之禍皆自開採啓之時稅使楊榮縱其下吳顯忠以開採爲名恣橫暴蠻人苦之且欲令麗江退地聽採緬酋因得執詞深入巡按宋興祖極言其害請追還榮等帝皆不納也凡採辦必先輸官然後與商賈貿易每往五六百人其屬有地羊賽在孟密東往來道所必經人工幻術採辦人有強索其飲食者多腹痛死已所乘馬亦斃剖之則馬腹皆木石也思真嘗勦之殺數千人不得絕至是復議勦以兵少中止

孟養蠻名迤水有香柏城元至元中於孟養置雲遠路軍民

總管府。洪武十五年。平雲南。改爲雲遠府。其地故屬平緬。宣慰司主之。雖內屬未嘗分職也。及平緬思倫發。爲其下所逐。走京師。帝命西平侯沐春。以兵納之。還故地。三十五年。分元所置雲遠路。爲孟養府。以土官刀木旦。爲孟養知府。永樂元年。刀木旦遣姪刀滿賽等來朝。貢方物及金銀器。賜絨錦金織文綺表裏如例。二年。改孟養府。爲軍民宣慰使司。以刀木旦。爲宣慰使。賜之誥印。俾子孫世襲。四年。刀木旦與戛里相仇殺。而緬甸宣慰那羅塔。乘釁發兵劫之。殺刀木旦。及其長子思樂。發掠其人口牛馬。遂據其地。事聞。詔行人張洪等齎敕諭責之。那羅塔懼。遂歸其境地。九年。以刀玉養。爲孟養宣慰使。賜宴遣還。十一年。木邦宣慰使罕賓。法以那羅塔侵據

孟養地。請自率兵討。帝許之。破緬甸城寨二十餘。并獲其象馬。悉獻京師。十四年。復設孟養軍民宣慰使司。命故土官刀木旦次子刀得孟。爲宣慰使。初刀木旦。及其長子思樂。發爲緬甸那羅塔所殺。司遂廢。孟養之人。從木旦之姪玉賓。散居干崖金沙江諸處者。三千餘人。朝廷嘗命玉賓。署宣慰使。以撫之。至是復設宣慰司。授刀得孟宣慰使。改授玉賓。爲本司同知。令率其衆復業。仍遣使諭那羅塔。各守疆土。毋侵擾。十五年。刀得孟遣使貢馬方物。賜鈔五十錠。綵幣五十匹。宣德五年。刀玉賓奏。伯父刀木旦。原任宣慰使。爲土官刀木浪所殺。據有其地。後蒙朝廷遣官訪求玉賓。授以同知。又阻於緬甸土官。不得已寄居金齒。二十餘年。今孟養地。又爲麓川宣

慰思任發所據。乞遣兵送歸本土。以圖報効。帝命黔國公沐晟遣還之。八年。復立孟養宣慰司。以故宣慰刀木旦子刀孟塾為宣慰。及同知刀玉賓同撫軍民。如舊貢賦。然是時孟養宣慰雖立。其地總為思任發所據。及思任發敗奔緬甸。其子思機發潛匿孟養求撫。復據麓川。朝廷嘗遣敕諭孟養宣慰。能擒除思任發父子。還爾故地。且膺厚賞。時宣慰新立。勢孤未能也。十三年。又敕孟養宣慰司大小頭目。令其勸諭伴送思機發來朝。許以陞賞。思機發疑畏。竟不至。蓋孟養之人。陰與之表裏云。於是帝以孟養宣慰大頭目刀變蠻等。隱藏思機發。敕數其罪。諭之曰。孟養乃本朝開設衙門。爾刀變蠻等。敢拒違朝命。一可伐。思機發係賊子。爾等故縱不捕。二可伐。

爾孟養昔被思任發侵奪其地。逐爾宣慰刀孟賓。見在雲南優養。爾等與仇為黨。三可伐。雲南總兵官。世世管屬爾地。茲奉命接收賊子。爾等不從調度。四可伐。爾等不過以為山川道路險阻。官軍未易遽到。又以為氣候瘴癘炎熱。官軍不可久居。勢強則拒敵。力弱則奔遁。殊不知昔馬援遠標銅柱。險阻無傷。諸葛亮五月渡瀘。炎熱無害。皆能破滅蠻眾。開拓境土。況今大將有必勝之機。麓川之師。可為前鑒。爾等速宜悔過自圖。令思機發親自前來。仍與一官一地。令享生全。如不肯出。爾等即捕擒。為上策。拒思機發。報與官軍接收。為中策。若代彼支吾。令其逃匿。則并爾等勦滅。悔無及矣。時已三征麓川。內旨必欲生擒賊渠思機發。已密諭總督王驥矣。又敕

諭以雲南安置孟養舊宣慰乃孟賓爲嚮導及兵出窮征思
機發卒遁去不可得於是乃以孟養地先給緬甸宣慰馬哈
省管治命捕思機發時正統之十四年也景泰二年思機發
之子思卜發遣使來貢求管孟養舊地廷臣議孟養地已與
緬甸豈可移易而思卜發展轉觀望亦難允其所請時朝命
雖不之許然思卜發已潛據之卽緬甸不能奪而有也思卜
發死子思洪發嗣自天順成化每朝貢輒署孟養地方儼然
自有其地矣成化七年緬甸申與地之請廷議以思洪發所
掌謝之十二年緬甸宣慰奏以孟養貢章酬功之旨出於前
朝今不予地思洪發反奪之扼其朝貢駐泊之所乞仍歸緬
帝命傳諭思洪發以朝貢往來通道不得阻遏并敕緬使勿

多望生事十八年孟養金沙江思陸發遣人來朝貢象馬賜
宴幣如例二十三年思陸發復遣人來朝貢賜賚如前思陸
者故麓川叛寇思任發之遺孽也靖遠伯王驥南征時知陸
未可遽滅與之約誓非總兵官軍符徵發不許過江時思洪
發雖假息孟養勢已微獨思陸漸盛成化中太監錢能鎮雲
南思陸數以珍物遺能因得入貢稱孟養金沙江思陸發不
係銜比思洪發故事常窺立功以襲祖職適木邦宣慰罕乞
法納婦孟乃爲部下信蠻所遮不得歸孟密安撫土舍思揲
因侵據木邦地爭殺累年未決雲南守臣議征思陸乃自請
効力勦捕思揲時蠻衆相傳孟密素畏思陸兵參政毛科以
爲然請於總兵鎮巡官許之時思揲方圍蠻遮急木邦宣慰

妻亦求救於思陸。兵未至。思揲聞解去。巡撫張誥議發思陸兵。令戮力捕思揲。且令蘭昂促之發兵。思陸乃遣大陶孟倫索領蠻兵象馬過江。倫索既過江。指鷹謂蘭昂曰。我曹猶此鷹。奪得土地。卽管食之耳。科聞之憂甚。時思揲起兵。令陶孟思英等守蠻莫。孟養兵亦營於蠻莫寨。思英堅守不出。已而請和。孟養兵聞思英約降也。頗有怨言。官軍糧絕。遽引還。倫索亦恐思英絕其歸路。取道干崖而還。科念倫索前語。急戒令孟養還兵守疆界。孟養不聽。自是遂犯約。數興兵渡江。與孟密戰。弘治十二年。雲南巡按謝朝宣奏。孟養思陸本麓川叛種。竄居金沙江外。成化中嘗據緬甸之聽蓋。弘治七年徵調其兵渡江。遂復據騰衝之蠻莫。又率木邦起兵。攻燒孟密。

安撫司殺掠蠻民二千餘人。劫象馬金寶。有併吞孟密。覬覦故土之志。迤西人恭們。騰衝人段和。爲之謀主。屢撫不聽。雲南會城去孟養遠。聲勢難接。曩於金騰處添設鎮守。太監爲撫蠻安民之計。而近時太監吉慶貪暴無狀。屢激變。故雖嘗陽却思陸之贄。然蠻知其貪而餽之。又烏知其不因其却。而更進之。臣聞蠻莫等處。乃水陸會通之地。蠻方器用。咸自此出貨利之盛。非他方比。以故思陸屢撫不退。況邇年來。透漏邊情。不止恭們段和而已。又有江西雲南大理逋逃之民。多赴之。而雲南差官。每多齎違禁物。往彼餽送。漏我虛實。爲彼腹心。鎮夷關一巡檢耳。官小職微。安能禁制。臣愚計之。孟養甲兵不能當中原一大縣。以雲南之勢臨之。易於壓卵。奈何。

一調卽來。屢撫不退。皆鎮巡失之於初。逋逃奸人。謀之於中。撫蠻中官。壞之於後。伏望垂念邊民困苦。將雲南鎮守太監。止存一員。取回一員。別用指揮一員。守備鎮夷關。驅思陸退歸江外。而移騰衝司於蠻莫。并木邦孟密。不得窺伺。乃爲萬全之策。設思陸冥頑。不聽撫諭。便當決於用兵。使無噍類。以爲上官不法之戒。先是慶已爲思陸請朝貢。至是因朝宣疏。并下鎮巡官。議勦撫之宜。以聞。數年不決。十六年。巡撫陳金。乃遣金騰參將盧和。同參議郭緒。副使曹玉。撫諭孟養思陸。和先至騰衝。孟養遣陶孟來投緬書致方物。和諭以禍福。使歸語思陸。掣兵過江。歸所占蠻莫等地。且調隴川干崖南甸三宣撫司蠻兵及戰象。偕官軍分道至金沙江。思陸乃遣大

陶孟倫索怕卓等。率所部來見。和等再申諭之。思陸聽命。退還前所據蠻莫等地十三處。撤回象馬蠻兵。過金沙江而歸。又遣陶孟招剛等。貢象六隻。銀六百兩。并金銀酒器金鞍金鈎象牙土錦孔雀尾等方物納款。鎮巡官以聞。因言蠻莫等地。原隸木邦。成化間。始爲孟密所有。至弘治十年。爲思陸所據。連年構禍。今始平定。其地旣不可復。與木邦孟密。又不可割界隴川干崖南甸三宣撫。宜暫於騰衝。歲檄官軍四百。分番守之。其思陸前有。助平思揆功。今悔禍納款。請賜以名目。冠帶。仍降敕獎諭之。部議以蠻莫等處。本木邦分地。在大義宜歸之。木邦其名目冠帶。貢使已言。思陸不願受。不宜輕畀。請敕厚勞。遣歸之。報可。時思陸覲得宣慰司印。部執不予。於

是數出兵。與木邦孟密相仇殺。無寧歲。嘉靖七年。總兵官沐紹勛巡撫歐陽重遣參政王汝舟知府嚴時泰等徧歷諸蠻。諭以禍福。孟養思倫等各願貢象牙土錦金銀器。退地贖罪。乃以蠻莫等十三處地方。土地寬廣。諸蠻歷年所爭。屬之騰衝司。檄軍輪守。則煙瘴可虞。屬之木邦。則地勢遼遠。蠻心不順。莫若仍屬孟密管領。歲徵差發銀一千兩。而割孟乃等七處。仍歸木邦罕烈。則分願均。而忿爭息矣。報可。先是思陸死。子思倫糾木邦與孟密擊殺緬甸宣慰莽紀歲。而分據其地。及紀歲之子瑞體長。欲報父仇。而復故地。時攻掠孟養。與思箇爲難。萬曆五年。雲南巡按陳文燧言。孟養思箇與緬世仇。今更歸順於緬。因引弘治朝先臣劉健嘗議孟養事狀。謂思

陸有官猶可制。卽無官其僭自若也。不如因而官之以抗緬。報可。十一年。緬爲游擊劉縝所敗。孟養思威亦殺緬使。降於縝。十三年。隴川平。乃於孟養立長官司。而酋思眞已爲緬擄。其部衆思遠奉思眞妻來歸。給以冠帶。令思遠佐其妾守。孟養思遠乘亂自立爲宣慰。貢象進方物。暴虐諸部。諸部引緬兵至。聲言還思眞。思遠奔蓋西。有思轟者。內附於蠻莫思正。共據險抗緬。三十年。緬追思正。轟率兵倍道馳救。至則正已被殺。三十二年。緬攻入迤西。轟走死。緬以頭目思華據之。華死。妻怕氏領其衆。緬中他目更番戍守。連年發兵從行。其苦之曰。孟養不亾。蠻何得至此。旣轟之遺種。曰放思祖。有衆千餘。不敢歸。寄食于崖云。舊制。宣慰遣人。俱稱頭目。惟木邦及

緬甸。又有陶孟及招剛等稱。孟養司又有招八稱。皆見於奏章。因其俗不改。

車里卽古產里。爲倭泥貂獫諸蠻雜居之地。古不通中國。元世祖命將兀良吉解伐交趾。經所部降之。置撒里路軍民總管府。領六甸。後又置耿凍路。耿當孟弄二州。洪武十五年。定雲南蠻長刀坎來降。改置車里軍民府。以坎爲知府。三月。坎遣姪豐祿來貢方物。詔賜豐祿衣一襲。鈔十錠。尋又賜坎及豐祿織金文綺九匹。帛如之。鈔八十衣五十事。以其初奉貢來朝故也。十七年七月。遣其子刀思拂來貢。賜坎冠帶鈔幣。八月。改車里軍民府爲車里軍民宣慰使司。以坎爲宣慰使。二十四年。子刀暹答嗣。遣弟刀三怕刺來貢象及方物。二十

八年。刀暹答以賜誥命。遣其弟刀吾等謝恩朝貢。子賜如例。永樂元年九月。刀暹答命其下剽掠威遠。擄其知州刀算黨及民人以歸。西平侯沐晟奏聞。請發兵討。帝命晟移文諭之。如不悛卽以兵繼。又以車里已納威遠印信。是悔過之心已萌。不必加兵。晟使至。暹答果懼。還刀算黨及威遠之地。遣弟刀臘貢馬謝罪。都御史陳瑛奏。宜下刀臘法司。并逮問刀暹答。庶示懲。帝以其能改過宥之。二年七月。暹答復遣子刀魯來貢方物。命賜暹答誥命冠帶綺帛如例。八月。遣內官楊瑄齎敕撫諭車里等土官。道經八百大甸。爲宣慰刀招散所阻。弗克進。三年七月。刀暹答遣土目攬線思奏。請舉兵攻八百大甸。帝嘉其忠義。但以招散幼弱。慮爲奸邪。孟乃朋孟允公

等所播弄。遽爾加兵。恐虐無辜。特遣司賓田茂。推官林禎。齎救同車里人往諭。命出諸奸免其罪。且敕晟諭車里。而刀招散仍桀驁自如。十二月。命晟率師及車里木邦諸宣慰兵。至八百境。破其猛利石厓及者荅二寨。木邦又破其江下等十餘寨。八百恐。遣人詣軍門伏罪。晟駐兵。以八百所陳詞奏聞。詔宥之。救車里等班師。益嘉刀暹荅忠。四年。元江軍民遣人餽運軍儲。抵車里境。悉爲守者阻遏。時刀暹荅征八百。未與其事。然懼爲元江所構。遣其子刀典名入國學。實自質。冀朝廷不疑。帝知其隱。賜典衣服鈔幣。慰諭之。遣還。五月。帝以雲南道里遼遠。諭車里等。三年一貢。著爲令。暹荅遣姪刀鵠男刀者板等貢方物。帝念其從征有勞。遣使齎敕褒諭。賜白金

百五十兩。錦二疋。羅八。并賜其土目攬線思等表裏有差。又以紵絲羅各九匹。賜其妻。十一年十一月。帝遣中官洪仔生齎敕往賜刀暹荅。至而暹荅卒。長子刀更孟自立。驕很失民心。未幾亦卒。更孟長子霸羨應襲。以年幼衆推刀賽署司事。刀賽者。更孟弟。刀怕漢也。怕漢死。妻以前夫子刀弄。冒爲暹荅孫。請襲。十五年二月。命刀弄襲車里宣慰使。以更孟從弟刀雙孟爲本司同知。十九年正月。雙孟言。刀弄屢以兵侵劫蠻民。不得寧處。乞別設治所。公撫其衆。詔割其地。置靖安宣慰使司。陞雙孟爲宣慰使。命禮部鑄印給之。宣德三年十二月。雲南布政司奏。刀弄與族叔靖安宣慰刀雙孟相仇殺。弄棄地投老。搆請差官招撫。帝命黔國公計議。以聞。六年五月。

黔國公復奏謂奉命招撫刀弄其母具言布政司承差劉亨來徵差發金已爲亨取既本司復來徵乃知爲亨所誑刀弄復徵於蠻民因激變逐弄弄逃入老撾尋還境內以死未嘗棄地投順亦未嘗與刀雙孟仇殺且雙孟已死子霸供又襲矣已往事求寬釋以聞帝命法司執劉亨等罪之七年九月車里土舍刀霸羨遣頭目召哀入貢請襲從之遣行人陸頊齋救賜冠帶襲衣九年十月靖安宣慰刀霸供言靖安卽車里舊地今析爲二致下人屢有爭端乞仍并爲一歲貢如例帝從其請革靖安宣慰仍車里軍民宣慰司命刀霸供刀霸羨共爲宣慰使俾上所授靖安宣慰司印正統五年十月命齋敕并綺幣賜刀霸羨及妻嘉其勤修職貢也六年二月麓

川宣慰思倫發叛詔給車里等各長官信符金牌命合兵勦賊景泰三年五月以刀霸羨屢調兵有功免其從前累欠差發金天順元年二月總兵官沐璘奏刀霸羨自殺弟板雅忠等已推兄三寶歷代承職今板雅忠又作亂糾合八百相仇殺欲調軍撫勦值春暖瘴高未宜動衆帝命璘亟宜撫諭并勘應襲者奏聞二年六月三司官奏三寶歷代者亦刀更孟子母金氏以更孟死改適今欲以三寶歷代繼霸羨此板雅忠所以搆兵也帝以三寶歷代乃庶孽奪嫡謀害刀霸羨以致板雅忠借兵攻殺宜不當襲但蠻民皆推立之姑從衆願命襲宣慰使成化十六年交趾黎灝率衆侵掠且頒僞敕於車里期會兵共攻八百車里持兩端雲南守臣以聞特遣使

救車里諸土官互保障勿懷二心。二十年以兵部尚書張鵬奏復救車里等慎固封疆防交人入寇不得輕與文移。啓爨納徼嘉靖十一年緬賊莽應裏據擺古蠶食諸蠻諸土司多被脅爲莽嚮導時車里宣慰刀糯猛亦折而入緬有大小車里之稱以大車里應緬而以小車里應漢萬曆十三年命元江土舍那恕往招糯猛復來歸獻馴象金屏象齒諸物謝罪詔受之聽襲職天啓七年四月巡撫閔洪學奏緬酋召霸浪烏罕者舉兵侵孟艮府府就車里求助宣慰刀韞猛遣兵萬人象十隻往援之比向車里報復韞猛年已衰邁急欲求解且重賂修和緬聞韞猛男召河璇有女名召烏岡色美責獻烏岡河璇別以女給之緬知其假大憤攻車里愈急韞猛父

子不能支遁至思毛地緬以嚮導二人星馳尾之獲韞猛并河璇械還請亟興師問罪時中朝未及議加兵車里遂殄云老撾俗呼爲撾家古不通中國洪武三十五年九月老撾土官刀線歹備方物入貢始置老撾軍民宣慰使司永樂二年四月以刀線歹爲宣慰使命禮部鑄印給之五年九月刀線歹遣頭目來朝貢金銀器皿方物賜鈔幣有差十月帝以刀線歹潛通安南李聲遣使詰責諭其悔過六年十月刀線歹遣人來朝貢象馬方物予賜如例七年五月刀線歹遣頭目板懶等進金銀器犀象方物來謝罪願修職貢不敢悖許之自是連年遣人入貢賚予如例復命禮部遣中官楊琳往賜以絨錦金織文綺等物十年十月來貢命禮部加賜焉宣德

六年五月遣使齎敕獎諭宣慰刀線達并賜綵幣表裏九年宣慰刀攬掌遣頭目混淪來朝貢馬及金銀器皿賜予遣還道中多為他部所阻至是乃敕孟良車里諸部土官各遣人護之而先是總兵官沐晟遣人送混淪等至其境聞老撾率國人與八百國仇殺晟請給信符護送至是復來朝仍命給之景泰元年命故宣慰刀線友子板雅者襲職五月板雅者遣頭目雷內等貢象馬方物循例予賜雷內又請賜土官衣服故事無加賜衣服者詔加土官錦二紵絲紗羅各四并賜其妻紵絲羅各三成化元年給金牌信符於老撾七年鑄給老撾軍民宣慰使司印以皆為賊焚燬也十六年宣慰遣使來朝賚予如例時老撾被交趾所攻鎮守內官錢能以聞因

敕老撾使兼程回并量給道里費十七年安南黎瀨率蠻兵九萬開山為三道進兵破哀牢繼進老撾地殺宣慰刀板雅蘭掌父子三人其季子怕雅賽歸依八百宣慰刀攬那遣兵送往景坎黔國公沐琮以聞命怕雅賽襲父職免其貢物二年賜冠帶綵幣以示優恤既怕雅賽欲報安南之仇覬中國發兵為助帝以老撾交趾皆服屬中國久恤災解難中國體也令琮慎遣人諭之弘治十一年宣慰舍人招攬章應襲宣慰使遣頭目刀乃等來貢因請給賜冠帶及金牌信符命賚賞如例其金牌信符待襲職後鎮巡官保勘至日給之十一月招攬章遣使入貢吏部因言招攬章本係舍人未授職僭稱宣慰使雲南三司官冒奏違錯俱宜治罪帝悉宥之嘉靖

九年。招攬章言。有交趾應襲長子光紹。爲叔所逐。出亾老撾。欲調象馬送回。守臣言。據招攬章之言。懼納亾之罪。且假我爲制服之資。留之啓釁。遣之招兵。宜聽光紹自歸。并責其私納光紹之罪。報可。二十四年。雲南巡撫汪文盛言。老撾宣慰土舍怕雅。一聞征討安南。首先思奮。且其地廣兵多。彼國畏之。可獨當一面。八百車里。與老撾相近。孟艮在老撾上流。皆多兵象。可備征討。請免其察勘。就令承襲。卽駐兵本州。以備征調。詔可。四十年。老撾宣慰司土舍怕雅。遣人貢象及龍涎香。給賞如例。四十四年。土舍怕雅攬章。遣人進舞牌牙象二。母象三。犀角十。雲南守臣以聞。禮部以非貢期。無漢緬公文。第來路險遠。跋涉踰年。宜受其所貢。給賞遣之。無令赴京。

報可。時緬賊勢方張。翦除諸部。老撾遂折而入緬。符印俱失。萬曆二十六年。緬敗。老撾來歸。奉職貢。請頒印。遂復鑄老撾軍民宣慰使司印給之。四十年。老撾宣慰遣頭目光倫等。齎貢方物。以印信燬於火。復請再給。撫鎮官以聞。許之。四十一年。鑄印給老撾。時宣慰猶進貢象。隻銀器。緬席。賜予亦如例。自是遂不復至。云。其俗與木邦同。其部長不知姓。有三等。一曰招木弄。二曰招木牛。三曰招木化。而爲宣慰者。招木弄也。代存一子。絕不育。其地東至水尾。南至交趾。西至八百。北至車里。西北六十八程。至雲南布政司。

八百。世傳其部長有妻八百。各領一寨。因名八百媳婦。元初征之。道路不通而還。後遣使招附。元統初。置八百等處宣慰。

司。洪武二十一年。八百媳婦國遣人入朝貢。二十四年。八百宣慰使司土官刀板冤遣使貢象及方物。先是西平侯沐英遣雲南左衛百戶楊完者往八百招撫之。至是來貢。帝諭兵部試尚書茹瑄曰。聞八百與百夷構兵相仇殺無寧歲。朕念八百宣慰遠在萬里外。能修職奉貢。深見至誠。今與百夷構兵。當有以處之。可諭意八百。練兵固禦。俟王師進討。二十七年五月。刀板冤遣其叔父刀板直貢象牙。蓆香等物。賜板直等三十六人。鈔羅綺布有差。二十八年十一月。刀板冤遣其下招板阿畝曠等貢紅白西洋布。弔賣壁衣。手巾。翦絨單。及象牙。白檀香等。詔賜其使綺鈔。三十五年九月。土官刀板面來朝貢方物。賜如例。永樂二年五月。土酋刀招你遣頭目板

暖等來朝貢方物。於是設八百者乃八百大甸二軍民宣慰使司。以土官刀招你為八百者。乃宣慰使。其弟刀招散為八百大甸宣慰使。遣員外郎左洋往賜誥印冠帶襲衣。是月。刀招散遣人來朝貢馬及方物。賜予如例。命五年一朝貢。七月。遣內官楊瑄齎敕往諭孟定孟養等府。道經八百大甸。為土官刀招散所阻。弗克進。三年七月。遣使諭刀招散曰。朕特頒金字紅牌救諭。與諸邊為信。以禁戢邊吏生事擾害。用福爾眾於無窮。其車里老搥木邦孟養諸宣慰。孟定威遠等府州。皆敬恭聽命。無所違禮。惟爾年幼無知。惑於小人孟乃朋孟允公等教誘。啓釁生禍。聞使臣至境。拒却不納。爾之罪辜。不可悉數。廷臣咸請興師問罪。朕念八百之人。豈皆為惡。兵戈

所至必及無辜有所不忍茲特遣司賓田茂推官林禎齋敕往諭爾能改過自新即將奸邪之人擒送至京庶幾境土可保人民獲安其或昏迷不悛發兵討罪孥戮不貸并敕西平侯沐晟嚴兵以待如悔罪輸誠即止兵勿進其以馬軍六百步軍一千四百護內官楊安郁斌前往又慮老撾乘車里空虛或發兵掩襲其後或與八百為援可遣其部長率兵一萬五千往備三年十月刀招你等遣頭目乃三哈抄等奉金縷表文貢金結絲帽及方物賜鈔文綺有差十二月西平侯沐晟奏奉命率師及車里諸宣慰兵至八百境內破其猛利石厓及者荅二寨又至整線寨木邦兵破其江下等十餘寨八百恐遣人詣軍門陳辭伏罪臣等恪遵敕旨駐兵不進其車

里等宣慰亦俟朝命方敢班師乃以八百所陳詞奏聞因遣使敕諭車里木邦等土官曰曩者八百不恭朝命爾等請舉兵誅嘉爾忠誠已從所請今得西平侯奏言八百已伏罪納款夫有罪能悔宜赦宥之敕至其悉止兵勿進遂敕晟班師四年七月敕諭刀招散繼今改心易慮毋懷譎詐以蹈前愆八月刀招散遣頭目板賽蘇等貢方物謝罪帝以不誠却之五年正月刀招散復遣頭目招板禿魯油等至貢方物及金銀器自陳以前却其貢獻至是復來謝罪命禮部受之六年八百所轄孟掌浪諸寨初平其頭目悶刀遣陶孟刀永弄等詣闕貢金銀器及馬犀牛謝罪賜之鈔紵紗羅十一月刀招散遣頭目板高等奉金縷表文貢象及金銀器等物賜予如

例七年八月復遣頭目來貢。命禮部賜子如例。洪熙元年三月遣內官洪仔生齎敕往賜刀招散。宣德七年十月遣人來貢。因奏波勒常以土酋土雅之兵來寇。殺人掠財。乞發兵討之。帝以八百大甸去雲南五千餘里。波勒土雅皆未嘗歸化。勞中國爲遠蠻役非計。止降敕慰諭而已。正統五年遣頭目刀招三板浩等來朝。貢象馬及金銀器皿象牙犀角諸方物。賜宴賚刀招三板浩。因奏遞年進貢方物。本土民不識禮法。不通漢語。乞依永樂年間例。仍令通事齎捧敕諭金牌信符。依時催督進貢。驛路令軍卒護送。庶無失所。從之。十年給八百大甸宣慰司金牌印信符各一。以前給牌符被暹羅國寇兵焚燬也。成化十六年八百宣慰遣頭目來朝貢。十七年安

南黎瀨已破老撾。頒偽敕於車里。期會兵攻八百。其兵有暴死者數千。傳言以爲雷所震。八百因遣兵扼其歸路。襲殺萬餘。交人敗還。土官刀攬那以報黔國公沐琮奏。攬那能保障生民。擊敗交賊。救護老撾。交人嘗以偽敕脅誘八百。八百毀敕以象蹴之。請賜頒賞。以旌忠義。奏至。帝命雲南布政司給官銀百兩。絲幣四表裏以獎之。二十年刀攬那遣人入貢。雲南守臣言。交兵雖退。宜令八百諸部飭兵爲備。弘治二年八百大甸故宣慰使刀攬那孫刀整賴貢方物。求襲祖職。兵部言。八百遠離雲南瘴毒之地。宜免勘予襲。從之。仍給冠帶。賜予如例。正德八年八百大甸刀整賴遣頭目貢象馬。賜賚之。其地東至車里。南至波勒。西至大古喇。與緬鄰。北至孟良。自

姚關東南行五十程。始至平川。數千里有南格刺山。下有河。南屬八百。北屬車里。好佛惡殺。每村必有寺。有塔以萬計。有見侵乃舉兵。得仇即已。名慈悲國。嘉靖間。為緬所兼并。避居景線。一名小八百。自是朝貢遂不至。緬以弟莽應龍居景邁城。倚為右臂焉。萬曆十五年。八百大甸上書請恢復。不許。初四譯館通事。僅譯外國。惟緬甸八百如之。蓋二司於六慰中加重焉。

明史藁

列傳第一百八十九終

明史藁

列傳第一百九十

光祿大夫 經筵講官明史總裁戶部尚書加七級臣王鴻緒奉敕編撰

貴州土司

貴陽

思南 思州附

鎮遠

銅仁

黎平

安順

都勻

平越

石阡

新添衛 金筑安撫司附

貴州古羅施鬼國。漢西南夷。牂牁武陵諸傍郡地。元置八番順元諸軍民宣慰使司。以羈縻之。明太祖初起兵。克陳友諒。兵威振南服。思南宣慰田仁智。思州宣撫田仁厚。率先歸附。

太祖卽以故官授之。命世守其地。時元至正之二十五年也。及洪武五年。貴州宣慰。霽翠與宋蒙古歹及普定府女總管。適爾等。先後來歸。皆予以原官。世襲。當是時。帝方北伐中原。未遑經理南荒。又仁智等。歲修朝貢。最恭順。乃以衛指揮僉事。顧成。築城守之。賦稅聽自輸納。終帝世。未嘗郡縣其地也。至永樂十一年。思南與思州仇殺。始命成以兵五萬。執之送京師。乃分其地。爲八府四州。設貴州布政使司。而以長官司七十五分隸焉。屬戶部。置貴州都指揮使。領十八衛。而以長官司七隸焉。屬兵部。府以下。參用土官。其土官之朝貢符信。屬禮部。承襲屬吏部。領土兵者。屬兵部。其後府并爲六。州并爲四。長官司或分或合。釐革不一。然其地西接滇蜀。東連荆

粵。太祖於平滇。詔書言。霽翠輩不盡服之。雖有雲南不能守也。則已不能無意於黔矣。至成祖而遂成之。然貴州地皆崇山深箐。鳥道蠶叢。諸蠻種類。皆嗜淫好殺。畔伏不常。霽翠歸附之初。請討其隴居部落。帝曰。中國之兵。豈外夷報怨之具邪。及仁智入朝。帝諭之曰。天下守土之臣。皆朝廷命吏。人民皆朝廷赤子。汝歸善撫之。使各安其生。則汝亦可以長享富貴矣。夫禮莫大於敬上。德莫盛於愛下。能敬能愛。人臣之道也。二十一年。部臣以貴州逋賦。請帝曰。蠻方僻遠。來納租賦。是能遵聲教矣。逋負之故。必其地有水旱之災。宜行蠲免。自今而後。定其數以爲常。從寬減焉。二十九年。清水江之亂。旣平。守臣以賊首匿。宣慰家。宜俱罪。帝曰。蠻人鴟張鼠伏。自其

常態勿復問國初御蠻之道其固後世之龜鑑也夫

貴陽府舊爲程番長官司洪武初置貴州宣慰司隸四川永樂十一年改隸貴州成化十二年置程番府隆慶三年移程番府爲貴陽府與宣慰司同城府所轄在城北司所轄在城南萬曆時改爲貴陽軍民府領安撫司一曰金筑領長官司十八曰貴竹曰麻嚮曰木瓜曰大華曰程番曰韋番曰方番曰洪番曰臥龍番曰金石番曰小龍番曰羅番曰大龍番曰小程番曰上馬橋曰盧番曰廬山曰平伐其貴州宣慰司所領長官司九曰水東曰中曹曰青山曰劄佐曰龍里曰白納曰底寨曰乖西曰養龍坑初傳蜀漢時火濟從諸葛亮南征有功封羅甸國王後五十六代爲宋普貴傳至元阿畫世有


土於水西宣慰司靄翠卽其後也後曰安氏洪武初同宣慰宋蒙古互來歸賜名欽俱令領原職世襲後設布政使司而宣慰司如故安氏領水西宋氏領水東而八番降者皆令世其職六年八月詔靄翠位居各宣慰之上靄翠每年貢方物與馬帝賜錦綺鈔幣有加十四年宋欽死妻劉淑貞隨其子誠入朝帝賜之米三十石鈔三百錠又賜衣三襲遣歸時靄翠亦死妻奢香代襲歆中朝賜旣不能無慕而都督馬暉方鎮守其地欲盡滅諸羅代以流官則以事撻香欲激爲兵端諸羅果憤怒欲反劉聞止之爲走愬京師帝旣召問令招香至復賜劉綺鈔以歸十七年奢香遂率所屬來朝并訴暉激變狀且願効力開西部世世保境帝悅賜香錦綺珠翠如意

冠金環襲衣以歸。而名曄還罪之。香遂開偏橋水東。以達烏蒙。烏撒。及容山草塘諸境。立龍場九驛。二十年。香進馬二十三匹。每歲定輸賦三萬石。子安的襲。貢馬謝恩。帝曰。安的居水西。最為誠恪。命禮部厚賞其使。二十五年。的來朝。賜三品服。并襲衣金帶。白金三百兩。鈔五十錠。十月。香復遣其子婦奢助。及其部長來朝。進馬六十六匹。詔賜香銀四百兩。錦綺鈔幣有差。自是每歲貢獻不絕。報賜之隆。亦非他所敢望也。二十九年。香死。朝廷遣使祭之。的貢馬謝恩。的死子卜葩襲葩死。子中襲。中老姪聚襲。聚死。姪隴富襲。時正統七年也。隴富自陳祖父以來。累朝皆賜金帶。臣蒙恩受職。乞如例從之。是時宋誠之子斌年老。以子昂代。昂死。然代。十四年。賜敕隴

富母子。嘉其調兵保境之功。隴富頗驕。天順三年。東苗之亂。富不時出兵。聞朝廷有意督之。乃進馬謝罪。賜敕警之。富死。姪觀襲。觀老子貴榮襲。巡撫陳儀。以西堡獅子孔之平。由致仕。宣慰觀。與其子貴榮。統部眾二萬。攻白石崖。四旬而克。家自餽餉。口不言功。宜旌擢。特給觀正三品昭勇將軍誥。先是。貴州兩宣慰安氏。世居水西。管苗民四十八族。宋氏世居貴州城側。管水東。貴竹等十長官司。皆設治所於城內。銜列左右。而安氏掌印。非有公事。不得擅還水西。至是。總兵官為之請。許其以時巡歷所部。趣辦貢賦。聽暫還水西。以印授宣慰。宋然代理。貴榮老請以子佐襲。命賜貴榮父子。錦紵表裏。先是。宋然貪淫。所管陳湖等十二馬頭苗民。皆為科害。致激變。

而貴榮欲并然地復誘之作亂於是阿朵等聚眾二萬餘署立名號攻陷寨堡襲據然所居大羊腸然僅以身免貴榮遽以狀上冀令已撫按之會阿朵黨洩其情軍進討貴榮懼乃自率所部為助及賊平貴榮已死坐追奪然坐斬然遂奏世受爵土負國厚恩然變起於榮而身陷重辟乞分釋因從未減依土俗納粟贖罪都御史遂請以貴筑平伐七長官司地設立府縣皆以流官撫理巡撫覆奏以蠻民不願已乞然宋氏亦遂衰子孫守世官衣租食稅聽徵調而已時安萬鍾應襲驕縱不法漢民張純土目烏掛等導之游獵酒酣輒射人為戲又嘗撻其左右為所殺無子其從弟萬鎰宜襲鎰以賊未獲辭烏掛等遂以疎族幼子普者冒萬鍾弟曰萬鈞告襲

承勸官入其賄遂暫委鍾妻奢攝事萬鎰悔不立而恨烏掛之主其謀也遂以兵襲烏掛亦發兵相仇殺皆以萬鍾之死為辭巡按御史上其狀以萬鎰宜襲但與烏掛相誣訐宜各宥輸贖而梟殺鍾者并成純等受其賄者亦罰治詔如之未幾鎰死子阿寫幼命以萬銓借襲萬銓有助平阿向功提督尚書伍文定為之請萬銓亦自陳其功乞加參政銜賜蟒衣帝命賜以應得之服後阿寫長襲改名仁未幾仁死于國亨襲淫虐乃以事殺萬銓之子信信兄智與其母別居於安順州聞之因告國亨反巡撫王諍遽請發兵誅亨智遂為總兵安大朝畫策且約輸兵糧數萬及師至陸廣河智糧不至乃令人諭亨而止太朝毋進兵已渡河遂為亨所敗亨



懼大誅。勒兵自守。而遣使哀辭乞降。朝廷未之許。巡撫阮文中至。檄捕諸反者。而密使語國亨。亟出諸奸徒。割地以處安。智母子。還所費兵糧。朝廷當待汝以不死。於是國亨悉聽命。帝果赦不誅。而命亨之子民襲。亨事起於隆慶之四年。至萬曆五年。事乃已。亨既革任。日遣人至京。納賂伺察。為起復地。十三年。播州宣慰楊應龍。以獻大木。得賜飛魚服。加恩。亨亦以大木進。乞還給服色。誥封。如播州例。既而木竟不至。乃諉罪於木商。帝怒。命奪所賚。亨乃請補貢。以明不欺。帝仍如所請。於是亨子疆臣襲。時萬曆二十六年也。播州楊應龍已反。疆臣亦以戕殺安定事。為有司所案。科臣有言其逆節漸萌者。詔不問。許殺賊圖功。疆臣奏稱。播警方殷。臣心未白。帝復

優詔報之。巡撫郭子章。許疆臣。以應龍平後。還播所侵水西烏江地。六百里。以酬功。於是疆臣兵從沙溪入。有蜚語水西佐賊者。總督李化龍。檄詰。疆臣遂執賊二十餘人。以示不背。率所部奪落濛關。至大水田。焚桃溪莊。應龍伏誅。先是應龍之祖。以內難走水西。客死。宣慰萬銓。挾奏。索水烟天旺地。聽還葬。其地遂為水西所據。及播州平。總督分其地。為遵義平越二府。分隸蜀黔。以渭河中心為界。而命疆臣歸播侵地。代化龍者。為王象乾。主畫地。而子章以為侵地。始於萬銓。而非疆臣。安氏迫取於楊相。喪亂之時。非擅取於應龍。蕩平之日。且已許其裂土。今反奪其故地。臣無面目。以謝疆臣。願乞臣去象乾疏言。疆臣征播。殲應龍子惟棟。不實首功。可知至佯

敗棄陣。送藥往來。欺君助逆。迹已昭然。令還侵地。不咎既往。已屬國家寬大。若因其挾而予之。彼不爲恩。我且示弱。疆臣旣無功。不與之地。正所以成撫臣之信。宜留撫罷臣以爲重。臣無能與蕞爾苗噶沓者之戒。於是清疆之議。累年不決。兵部責令兩地巡按勘報。而南北言官。文章詆象乾貪功啟釁。科臣呂邦耀。復劾子章納賄縱奸。子章求去益力。象乾遂執疆臣所遣入京行賄之人與金。以聞於朝。然議者多右疆臣。尚書蕭大亨。遂主巡按李時華疏。謂征播之役。水西不惟假道。且又助兵。矧失之士司。得之士司。播固輸糧。水亦納賦。不宜以土地之故。傷字小之仁。地宜歸疆臣。於是疆臣增官進秩。其母得賜祭水西。尾大之患。亦於是不可制矣。三十六年。

疆臣死。弟堯臣襲。四十一年。烏撒土舍謀逐安效良。堯臣以追印爲名。領兵數萬。長驅入滇。直薄霑益州。所過焚掠。備極慘毒。朝廷方以越境擅兵。欲加堯臣罪。而堯臣死。遺子位幼。命其妻奢社輝攝事。輝永寧宣撫奢崇明女弟。崇明子寅獷悍。與輝爭地。仇恨相持。而安邦彥者。位之叔父也。素懷異志。與崇明合。及是因崇明反。調兵水西。邦彥遂挾位。叛以應之。位幼弱不能制。彥遂招故宣慰土舍宋萬化爲助。率兵趨畢節。陷之。分兵破安順平壩。霑益。而萬化亦率苗仲九股陷龍里。遂圍貴陽。自稱羅甸王。時天啟元年二月也。巡撫李棲方受代。聞變。與巡按御史永安。悉力拒守。賊攻不能克。則沿巖置柵。斷城中出入。鎮將張彥芳。將兵二萬赴援。隔龍里不

得進。貴州總兵楊愈懋推官郭象儀與賊戰於江門而死。外
援既絕。攻益急。城中糧盡。人相食。而拒守不遺餘力。中朝方
急遼不之省。八月。始以王三善爲巡撫。倉卒調兵。食至十一
月。貴陽圍益困。於是三善乃大會將士。分兵三道進。三日抵
龍頭營。邦彥兵屢敗。遂奪龍里。邦彥以新撫自將。意大兵數
十萬相顧愕。邦彥遂退屯龍洞。前鋒楊明楷率烏羅兵擊死
安邦俊。遂乘勝抵貴陽城下。先以五騎傳呼曰。新撫至矣。舉
城歡呼更生。貴陽被圍十餘月。城中軍民男婦四十萬。至是
餓死幾盡。僅餘二百人。詳李標王三善傳。貴陽圍既解。邦彥
遠遁陸廣河外。三善遣使諭社輝母子。縛邦彥以降。大軍至
者日益衆。三善欲因糧於敵。又諸軍視賊過易。前鋒楊明楷

營於三十里外。邦彥復糾諸苗來攻。師敗。明楷爲所執。邦彥
勢復張。合衆欲再圍貴陽。三善遣兵分三路禦之。破生苗寨
二百餘處。禽萬化等。焚其積聚數萬。龍里定番四路。並通諸
苗。畔者相繼降。邦彥奪氣不敢出。於鴨池陸廣諸要地掘塹
屯兵。爲自守計。時奢崇明爲蜀兵所敗。計窮投水。西借兵。邦
彥復以兵助之。三年六月。三善督兵攻大方賊巢。擒土司何
中尉等。進營紅崖。連破天台水脚等七囤。奪其天險。而別將
亦破賊於羊耳。追至鴨池河。奪其戰象。遂深入至紅鳥岡。諸
苗奔潰。三善率兵直入大方。奢社輝安位。焚其巢。竄火灼堡。
邦彥奔織金。位遂遣人赴鎮遠。乞降於總督楊述中。許之。令
擒崇明父子自贖。一意主撫。而三善責并獻邦彥。當并用勦。

議不合。往返間已逾數月。邦彥得益兵爲備。三善糧不繼。焚大方還貴州。道遇賊。三善爲所害。邦彥率數萬衆來追。總理魯欽力禦之。大戰數日。大軍無糧。乘夜皆潰。欽自剄。賊燒劫諸堡。苗兵復助逆。貴州三十里外。樵蘇不行。城中復大震。初大方東倚播。北倚藺。相爲犄角。後播藺旣平。賊惟恃烏撒爲援。而畢節爲四裔交通處。當三善由貴陽陸廣深入大方。百七十里。皆羅鬼巢窟。以失地利而陷。天啓間。朱燮元爲蜀督。建議滇兵出霑益。遏安效良應。援而別布天生橋。尋甸等。以絕其走。蜀兵臨畢節。扼其交通四裔之路。而別出龍場巖。後以奪其險。黔兵由普定渡思臘河。徑趨彥巢。而陸廣鴨池擣其虛。粵西出泗城。分兵策應。然後率大軍由遠義鼓行而前。

尋以憂去。未及用。總督閔夢得繼之。亦以貴州抵大方路險。而賊惟恃畢節一路。外通用兵。宜從永寧始。自永寧而普市而霑泥。而赤水。百五十里皆坦途。赤水有城郭。可憑而守。宜結營進逼。四十里爲白巖。六十里爲層臺。又六十里爲畢節。畢節至大方不及六十里。賊必併力來禦。須以重兵扼之。斷其四走之路。然後遵義貴陽尅期而進。亦不果用。及是黔事棘。詔起燮元。總督貴湖雲川廣。於是燮元再蒞黔。時崇禎元年也。奢崇明號大梁王。安邦彥號四裔大長老。其部衆悉號元帥。悉力趨永寧。先犯赤水。燮元授意守將。佯北誘深入。度賊已抵永寧。分遣別將林兆鼎從三岔入。王國禎從陸廣入。劉養鯤從遵義入。邦彥分兵四應。力不支。羅乾象復以奇兵。

繞其背急擊之。賊大驚潰。宗明、邦彥皆授首。邦彥亂七年而誅。燮元乃移檄安位，赦其罪，許歸附。位豎子不能決，其下謀合潰兵來拒。燮元扼其要害，四面迭攻，得首功萬餘級，復得嚮導，輒發窖粟就食，而賊益饑。復遣人至大方，燒其室廬，位大恐，遂率四十八日出降。燮元奏請，詔許之。而前助逆彥故宣慰宋萬化之子嗣殷亦至，是勦滅。乃以宋氏洪邊十二馬頭地置開州，建城設官焉。燮元復遣兵平擺金五洞諸叛苗，水西勢益孤。十年，安位死，無嗣，族屬爭立，朝議欲乘其敝郡縣之。燮元奏未可驟，乃傳檄土目，諭以威德，諸苗爭納土獻印。貴州始平。

思南，卽唐思州。宋宣和中，番部田祐恭內附，世有其地。元改宣慰司。明洪武初，析爲二宣慰，屬湖廣。永樂十一年，置府思南，領長官司四：曰水德江，曰蠻夷，曰沿河祐溪，曰朗溪。思州領長官司四：曰都坪，峨異溪，曰都素，曰施溪，曰黃道溪。太祖初起兵平漢，略地湖南，思南宣慰使田仁智遣其都事楊琛來歸附，并納元所授宣慰誥。帝以率先來歸，俾仍爲思南道宣慰使，以三品銀印給之，并授琛爲宣撫使。未幾元思州宣撫使田仁厚遣其都事林憲萬戶張思溫來獻鎮遠古州軍民二府，婺川、功水、常寧等十縣，龍泉、瑞溪、沿河等三十四州。於是命改宣撫爲思南鎮西等處宣慰使司，以仁厚爲宣慰使，俱歲朝貢不絕。二年，仁厚死，子弘正襲。久之，帝以思南土官世居荒服，未嘗詣闕，詔令率其部長入朝。九年，仁智入覲。

加賜織金文綺并諭以敬上愛下保守爵祿之道仁智辭歸至九江龍城驛病卒有司以聞遣官致祭并敕有司送其柩於思南是時思州田弘正與其弟弘道等來朝帝命禮部皆優其賜予十一年仁智子大雅襲奉表謝恩命思南收集各洞弩手二千人備征調十四年大雅入朝十八年思州諸洞蠻作亂命信國公湯和等討之時寇出没不常聞師至輒竄匿山谷間退則復出剽掠和等師抵其地恐蠻人驚潰乃於諸洞分屯立柵與蠻人雜耕使不復疑久之以計擒其魁餘黨悉潰師還留兵鎮之二十年移思南宣慰地於鎮遠大雅來謝恩是年思州宣慰弘正死子琛襲三十年大雅母楊氏來朝永樂八年大雅死子宗鼎襲初宗鼎兇暴與其副使黃

禧構怨累年奏訐朝廷以田氏世守其土又先歸誠曲與保全改禧為辰州知府未幾思州宣慰田琛與宗鼎爭沙坑地有怨禧遂與琛結圖宗鼎構兵琛自稱天主禧為大將率兵攻思南宗鼎挈家走琛殺其弟發其墳墓并戮其母屍宗鼎訴於朝屢救琛禧赴闕自辨皆拒命不至潛使奸人入教坊司伺隙為變事覺遣行人蔣廷瓚召之而命鎮遠侯顧成以兵壓其境擒執琛禧械送京師皆引服琛妻冉氏尤強悍遣人招誘臺羅等寨苗普亮為亂冀朝廷遣琛還招撫以免死帝聞而錮之以宗鼎窮蹙來歸得末減令復職還思南而宗鼎必得報怨以絕禍根帝以其幸免禍不自懲而更逞忿遂留京師宗鼎出誹言因發祖母陰事謂與禧奸實造禍本祖

母亦發宗鼎縊殺親母。瀆亂人倫事。帝命刑部正其罪。諭戶部尚書夏原吉曰。琛宗鼎分治思州思南。皆爲民害。琛不道。已正其辜。宗鼎滅倫。罪不可宥。其思州思南。二十九長官地。可更郡縣。設貴州布政使司總轄之。而命顧成勦臺羅諸寨。顧成斬苗普亮。思州賊平。十二年。遂分貴州地隸八府。貴州爲內地。自是始。兩宣慰廢。而田氏遂亾。正統初。蠻夷長官司。奏土官衙門婚姻。皆從土俗。乞頒恩命。帝以土司循襲舊俗。因親結婚者。旣累經赦。宥不論。繼今悉依朝廷禮法。違者罪之。景泰間。思南府奏。府四面皆山。關隘五處。無城可守。乞發附近土軍修築。命巡撫王來經畫之。

鎮遠故爲豎眼大田溪洞。元初置鎮遠沿邊溪洞招討使。後

改爲鎮遠府。洪武五年。改爲州。隸湖廣。永樂十一年。仍改府屬貴州。領長官司二。曰偏橋。曰邛水。十五洞。領縣二。曰鎮遠。卽金容。金達。楊溪。公俄。二長官司地。曰施秉。卽施秉長官司地也。洪武二十年。鎮遠州趙士能來貢馬。三十年。鎮遠鬼長。等等處苗民作亂。指揮萬繼。百戶吳彬戰死。都指揮許能。率兵會偏橋衛軍。擊敗之。衆散走。永樂初。鎮遠長官何惠言。每歲修治清浪。焦溪。鎮遠三橋。工費浩大。所部臨溪部民。皆犂犢。猫猪。力不勝役。乞令軍民參助。從之。宣德初。鎮遠邛水。與洞蠻苗章奴。劫掠清浪道中。爲思州都坪峩異溪長官司所獲。其父苗銀總。劫取之。聚兵欲攻思州。因令赤溪洞長官楊通諒。往撫銀總。伏兵殺諒。又掠埂洞。命總兵蕭授。調辰沅諸

衛兵萬四千人勦之。會於清浪衛。元年。授奏指揮張名。討銀
總克奧洞。盡殺其黨。銀總遁。正統三年。革鎮遠州。以鎮遠施
秉。二長官司。隸鎮遠府。十二年。巡按虞禎奏。貴州蠻賊出沒。
撫之不從。捕之不得。若非設策。難以控制。臣觀清水江等處。
峭壁層崖。僅通一徑。出入。彼得特險。爲惡。若將江外山口。盡
行閉塞。江內山口。并津渡。俱設關堡。屯兵守禦。又擇寨長。有
才幹者。爲辦事官。庶毋疎虞。從之。十四年。命賑偏橋衛。以被
苗寇殺掠。人民將盡。倉廩皆空。不能自存。有司以請。從之。天
順七年。鎮守湖廣太監郭閔奏。貴州洪江賊苗蟲蝦等。糾合
二千餘人。僞稱王侯。攻劫鎮遠。圍寨。殺掠人民。撫諭不服。誠
恐滋蔓。當合兵進討。命總兵李震。李安等。分道入。賊退守平

坤寨。追至清水江。獲蟲蝦。并斬賊首飛天侯苗老底。額頭等。
六百四十餘名。并復黎平之赤溪南洞。遂平。弘治十年。改鎮
遠。金容。金達。長官司。爲鎮遠州。設流官。以土官何倫父子罪
死。土人思得流官以治之。守臣以聞。及萬曆末。邛水長官司
楊光春者。貪暴。土目彭必信。濟之箕斂。苗不堪。將上訴。改土
爲流。春與必信反言。漢欲勦諸苗。當斂金贖。得金五百餘。都
御史何起鳴。訶知之。捕春下獄。瘐死。於是用漢法。每四戶擇
壯兵一人。立四哨。不爲兵者。佐糗糧。魚鹽。簡土吏何文奎等
掌之。必信復醜諸苗。金。愬於朝。言。巴也。梁止諸寨。爲亂。指揮
使陶效忠。不問。反索土吏楊光春金。而殺之。改舊例。用新法。
不便。書上。意自得歸。謁知府王一麟。麟縛之下獄。檄諸苗言。

若等十五洞所苦者以兵餉月米三斗過甚耳然歲給白蟲鋪米每洞月八斗他於平溪驛剩餘徵二十二兩皆可足餉我爲若通之母爲信所誣也苗皆服而坐信罪新法竟行時有土舍楊載清者應襲推官嘗中貴州鄉試命於本衛加俸級優異之天啟五年三月巡撫傅宗龍奏苗寇日披猖地方受害乞救偏沅撫臣移鎮偏橋勿復回沅凡思石偏鎮等處俾練兵萬餘人平時以之勦苗大征卽統爲督臣後勁庶苗患寧而西賊之氣亦漸奪矣報可

銅仁元爲銅人大小江等處軍民長官司洪武初改爲銅仁長官司永樂十一年置銅仁府領長官司五曰銅仁曰提溪曰烏羅曰省溪曰平頭著可曰大萬山初永樂時設治古峇

意寨二長官司隸貴州宣慰司以石各野爲峇意長官龍峇哥爲治古長官及十二年分置貴州府八遂陞烏羅爲府而以朗溪等四長官司隸焉宣德五年烏羅知府嚴律已言所屬治古峇意二長官石各野等聚衆出沒銅仁平頭瓮橋諸處誘脅蠻賊石雞娘并孛子坪長官吳畢郎等共爲亂招撫不從緣其地與鎮溪酉陽諸蠻接境恐相煽爲亂請調官軍土兵分據其地絕其糧道且捕且撫事平之後宜置衛所巡司以守之事聞命總兵蕭授及鎮巡諸司議授築二十四堡環其地守之兵力分卒難扞禦四出劫掠殺清浪衛鎮撫葉受勢益獗七年巡按御史以聞言生苗之地不過三百餘里乞別遣良將督諸軍殄滅授言殘苗吳不爾等遁入孛子坪

結生苗龍不登等攻劫湖廣五寨。及白崖諸寨。爲患滋甚。宜令川湖貴州接境諸官軍土兵分路併力攻勦。庶除邊患。從之。旣降。敕諭授言。暴師久。恐蹉跌。爲蠻羞。或撫或勦。朕觀成功。不從中制。八年。授奏言。臣受命統率諸軍。進攻賊巢。破新郎等寨。前後生擒賊首吳不跳等二百一十二人。殺吳不爾王老虎龍安軸等五百九十餘級。皆梟以殉。餘黨悉平。將所掠軍民男婦九十八口。悉給所親。獲賊婦女幼弱一千六百餘口。以給從征將士。并械吳不跳等獻京師。帝顧謂侍臣曰。蠻苗好亂。自取滅亡。然於朕心不能無惻。授威服南荒。前後凡二十餘年。正統三年。革烏羅府。以所屬治古峇意二長官司。作亂殘民。無幾亦并革之。惟存烏羅。平頭著可以隸銅仁。

朗溪以隸思南。從巡按御史請也。景泰七年。平頭著可長官司奏。其地多爲蠻賊侵害。乞立土城固守。從之。成化十一年。總兵官李震奏。烏羅苗人石全州。妄稱元末明氏子孫。僭稱明王。糾衆於執銀等處作亂。鄰洞多應之。因調官軍往勦。石全州已就擒矣。而諸苗攻劫未已。命鎮巡官設策捕撫。以聞。未幾平。嘉靖二十二年。平頭苗賊龍桑科作亂。流劫湖廣桂陽間甚獗。帝以諸苗再叛。責逼亂者。而起都御史萬鏜。往討之。明年鏜奏。鎮守銅平。叛苗以次殄滅。惟龍母叟雖降。然其罪大。宜置重典。命安置遼東。未幾龍子賢復叛。二十六年。湖貴巡按奏。官軍討賊不力。旨切責。二十九年。總兵石邦憲勦之。擒首惡龍老羅等。餘黨悉平。

黎平。元潭溪地也。洪武初。仍置長官司。永樂十一年。改置黎平宣化二府。宣德十年。并宣化入黎平。領長官司十三。曰潭溪。曰八舟。曰洪州泊里。曰曹滴洞。曰古州。曰西山陽洞。曰湖耳。曰亮寨。曰歐陽。曰新化。曰中林驗洞。曰赤溪浦洞。曰龍里。初洪武三年。辰州衛指揮劉宣武。率兵招降湖耳潭溪新化萬平江歐陽諸洞。於是諸洞長官皆來朝。納元所授印敕。帝命皆仍其原官。以轄洞民。隸辰州衛。既改龍里長官司。爲龍里衛。尋改爲軍民指揮使司。又增立五開衛以鎮之。隸思州。二十九年。清水江蠻金牌黃作亂。都司發兵捕之。金牌黃遁去。帝以賊首賈哈刺未獲。募能擒者賞千金。未幾捕獲五百人。械至京。以其脅從宥死。戍遠衛。有言金牌黃匿宣慰家者。

詔勿問。三十年。古州洞蠻林寬者。自號小師。聚衆作亂。攻龍里。千戶吳得鎮撫井孚力戰死之。寬遂犯新化。突至平茶。千戶紀達率壯士擊之。達突陣殺數人。以鎗橫挑一人擲之。流矢中臂。達拔矢復戰。賊驚曰。是平茶紀蒙邪。遁去。蓋蠻稱官爲蒙云。未幾復熾。命湖廣都指揮使齊讓爲平羌將軍。統兵五萬。征古州叛寇林寬等。既以讓逗遛。命楊文代之。又命楚王楨湘王柏各率護衛兵進討。城銅鼓衛。未幾讓擒寬等。械入京誅之。三十一年。又奏復平古州林寬餘黨。并俘獲三十岡等處洞蠻二千九百人。以歸。遂班師。永樂五年。寨長韋萬木來朝。自陳所統四十七寨。乞設官。因設西山陽峒長官司。以萬木爲屯長。宣德六年。改永從蠻夷長官司。爲永從縣。置

流官。以土官李瑛絕故也。又割思州新溪等十一寨。隸黎平赤溪。洞長官司。正統四年。計砂苗賊苗金蟲等。糾合洪江生苗。偽立統千侯統萬侯名號。劫掠四出。命都督蕭授調兵勦之。賊首苗總牌等。為都督吳亮所戮。洪江生苗。遂詣軍門降。授諭遣之。而命千戶尹勝誘苗金蟲。斬以徇。景泰五年。巡撫王永壽。以苗賊蒙能攻圍龍里新化銅鼓諸城。乞調兵勦之。而賊欲取龍里為巢穴。急攻破亮寨。銅鼓羅圍堡諸城。都指揮汪迪。為賊所殺。朝議以南和伯方瑛。為平蠻將軍。統湖廣諸軍討之。蒙能糾賊眾三萬。出攻平溪衛。瑛遣指揮鄭泰等。以火鎗攻之。斃賊三千人。能亦被殺。而能黨李珍等。尚煽惑苗眾。官軍計擒之。克復銅鼓藕洞。連破鬼板等。一百六十

餘寨。覃洞上陸諸苗悉降。天順元年。鎮守太監阮讓言。東苗為貴州諸苗之首。負固據險。僭號稱王。逼脅他種。東苗平。則諸苗莫敢不服矣。臣會同方瑛計議。并請師期。於是頒諭四川湖廣諸宣慰宣撫。同會師討賊。二年。督理軍務都御史白圭言。臣與瑛征東苗。臣以谷種山箐。乃東苗羽翼。宜先勦。因同瑛進青崖。總兵李貴。進牛皮箐。參將劉玉。進谷種。參將李震。進鬼山。所向皆捷。克水車壩等。一百四十七寨。諸將復合兵青崖。攻石門山。克擺傷等。三十九寨。仍分兵四路。進攻董農竹蓋。及甲底等。四百三十七寨。賊首千把豬。退守六美山。合兵大進。斬五千餘級。生擒千把豬。至京伏誅。先是麻城人李添保。以逋賦逃入苗中。自詭為唐後。聚眾萬餘。僭稱王。建

元武烈立故賊首蒙能子聰爲總兵官。遺之銀印敕書。縱兵剽掠。震動遠近。至是爲總兵李震所敗。餘賊大潰。添保僅以身免。潛入鬼池及絞洞諸寨。煽惑諸苗。劫攻中林龍里。亦爲震擒伏誅。萬曆二十八年。誅皮林逆苗吳國佐石纂太等。國佐本洪州司特洞寨苗。頗知書。嘗入永從學。爲生員。素桀黠。皮林諸苗推服之。因娶叛人吳大榮之妾。爲黎平府所持。遂反。自稱天皇上將。陽聽撫。而陰與播賊通。石纂太者。亦自稱太保。聚衆殺百戶黃鐘等百餘人。與國佐兵合。圍上黃堡。參將黃冲霄討之。爲所敗。殺守備張世忠。焚五開。破永從縣。圍中潮所。總兵陳良玘陳璘合湖貴兵進討。亦失利。國佐益橫。二十九年。命巡撫江鐸會兵分七路進勦。苗據險不出。總兵

陳璘潛師奪隘。縱火焚其巢。國佐逃擒之。石纂太亦爲他將誘縛伏誅。

元世祖收普里部蠻。置普定府。成宗改爲普定路。又普安路。並屬雲南。洪武初。爲普定府。十六年。改爲安順州。隸四川。正統三年。改屬貴州。萬曆中。改爲安順軍民府。以普安州屬焉。州故普安軍民府也。初隸雲南。尋廢爲衛。永樂間。改爲州。始隸貴州。領長官司二。曰寧谷。曰西堡。洪武五年。普定府女總管適爾及其弟阿囊來朝。遂命適爾爲知府。許世襲。六年。設普定府流官二員。十四年。城普定。十五年。普定軍民知府者額來朝。賜米及衣鈔。令諭各部衆。有子弟皆令入國學。十六年。者額遣弟阿昌及八十一砦長阿窩等來朝。二十年秋。徵

普定安順州六長官赴京。普旦入朝。命以銀二十萬備糴。遣普定侯陳桓等率諸軍駐普安分屯。明年。越州叛苗阿資率衆寇普安。燒府治。大肆剽掠。征南將軍傅友德擊走之。旦詣軍門降。遂改軍民府爲指揮使司。二十三年。西平侯沐英奏普安百夫長密卽叛。殺屯田官軍。及驛丞試百戶。調指揮張泰討之。於槃江木窄關。官軍失利。更調指揮蔣文統烏撒畢節永寧三衛軍勦之。乃遁。二十六年。普定西堡長官司阿德及諸寨長作亂。命貴州都指揮顧成討平之。二十八年。顧成討西堡土官阿傍平之。三十一年。西堡滄浪寨長必莫者聚衆亂。已而阿革傍等亦糾二千餘人爲亂。先後皆爲成擊斬。其地悉平。成還京師。永樂元年。故普安安撫者昌之子慈長

言。建文時。父任是職。宜襲。而吏部遵舊制罷之。但本境地濶。民稠。輸糧三千餘石。乞仍前職報効。命仍予安撫。十三年。改普安安撫司爲普安州。十四年。普安安撫慈長謀占營長地。且強取民人妻爲妾。殺其夫。聞命。命布政司孟驥具狀。慈長復領兵萬餘圍驥。驥以計擒之。逮至京。死於獄。宣德二年。總兵蕭授奏。水西土目阿閉妨宜等聚衆八千餘人。殺兵據箐。招撫不從。地與普定西堡蠻賊阿骨相連。恐互糾爲亂。請調兵討之。已而授奏。阿閉妨宜爲旁寨所殺。惟阿骨尚猖獗。請調兵討之。帝諭宜先撫後勦。未幾平。天順四年。西堡蠻賊聚衆焚劫。鎮守貴州內官鄭忠。右副總兵李貴。請調貴州土兵及川雲都司兵共二萬。并貴州宣慰安隴富兵二萬進

勦至阿果擒賊首楚得隆等斬首二百餘級餘賊奔白石崖復斬級七百餘焚其巢全師還十年安順知州張承祖與所屬寧谷寨長官顧鐘爭地仇殺下巡撫究治命各貢馬贖罪成化十四年貴州總兵吳經奏西堡獅子孔等苗洞亂先調雲南軍八千助防守聞雲南有警乞改調沅州清浪諸軍應援十五年經奏賊首阿屯堅婁等皆已擒斬以捷聞弘治十一年普安州土判官隆暢後妻米魯霑益州土知州安民女也忤暢出居其父家暢老前妻子禮襲父子不相能米魯與營長阿保通因令阿保諷禮迎已禮與阿保同丞之暢聞怒立殺禮燬阿保寨阿保挾魯與其子阿鮮等兵攻暢暢走雲南時東寧伯焦俊爲總兵官與巡撫錢鉞曲爲調護兩家各

唯唯魯於道中毒暢死遂與保據寨反暢別有妾適烏生二子別居安南米魯欲竝殺之於安南城外築寨圍之又別築三寨於普安而令阿鮮等防守名所居寨曰承天寨號無敵天王出入建黃纛官兵不能制鎮巡以聞發十衛及諸土兵萬三千人分道進責安民殺賊自贖民乃攻斬阿保父子於查刺寨米魯逃走焦俊等責安民獻魯民陰資米魯蠻兵五百襲殺適烏及其二子據別寨殺掠又自請襲爲女土官鎮巡官皆受魯賂請宥魯嚴旨切責必得魯乃已貴州副使劉福詭知兵衆倚福追勦而福陰索賂於魯官兵營於阿馬坡爲魯敗擄都指揮吳遠幾陷普安帝命南京兵部尚書王軾巡撫陳金都指揮李政進勦破二十餘寨魯竄馬尾籠官兵


圍之。乃擒斬魯。逮安民。自辨得赦。正德元年。暢族土婦適擦。襲土判官。赴京朝貢。帝嘉之。或曰。適擦亦暢妾。初西堡阿得。獅子孔阿江。二種皆獐獠也。初據滄浪六寨。不供常賦。土官溫鎧懼罪自縊死。其子廷玉請免賦。不允。往徵。為其寨長七呂等所殺。阿得所遣徵賦者。亦為呂殺。廷玉弟廷瑞。訴於守臣。此正德六年事也。至是也。呂死。指揮楊仁撫之。巡撫蕭翀。請令其輸賦。免用兵。從之。

都勻。元曰都雲。洪武十九年。置都勻安撫司。二十九年。改為軍民指揮使司。屬四川。永樂十一年。改隸貴州。弘治七年。置府領州二。曰麻哈。曰獨山。即合洲陳蒙爛土長官司地。領縣一。曰清平。即清平長官司地也。至是領長官司八。屬府者。曰

都勻。曰平浪。曰邦水。曰平州陸洞。其屬獨山者。曰九名九姓。獨山州曰豐寧。其屬麻哈者。曰樂平。曰平定。洪武二十二年。都督何福奏。討都勻叛苗。斬四千七百餘級。禽獲六千三百九十餘人。收降寨洞一百五十二處。二十三年。城都勻衛。命指揮同知董庸守之。二十五年。九名九姓蠻亂。命何福平之。二十八年。豐寧三藍等寨亂。命顧成移兵。討平之。二十九年。平浪洞水寨蠻狄把。殺土官王應名。都指揮程暹。討平之。應名妻吳。攜九歲子阿童來訴。詔予襲。永樂四年。鎮遠侯顧成。招諭合江州十五寨來歸。宣德元年。平浪賊紀那阿魯等。占副長官地。殺掠葉果諸寨。招諭不聽。詔蕭授討平之。七年。陳蒙爛土副長官張勉奏。所司去衛遠。地連古州生苗。與廣西

獠洞近化從寨長韋翁同等煽亂乞立堡并請調泗城州土兵一千鎮守從之九年翁同糾下高大刀蠻合廣西賊韋萬良等恣殺掠指揮陳原討擒賊首萬良等三人翁同遂聽撫而落昌蔡郎等四十寨仍聚眾拒敵總兵蕭授遣指揮顧勇進討未幾賊平成化十四年陳蒙爛土長官司張鏞奏天壩干賊首齋果侵掠又請於所侵大陳大步等寨設一司隸安寧宣撫而豐寧長官司楊泰亦奏峰峒陸光翁等聚爛土為亂先是宣慰楊輝平天壩干後即灣溪立安寧宣撫司爛土諸苗惡其逼已至是果等既攻陷天漂遂圍豐寧時輝已致仕子愛承襲力弗支求援於川貴二鎮各奏聞命仍起輝會兵討之十六年鏞復奏齋果糾合九姓豐寧并荔波賊萬人

攻剽愈亟帝責諸守臣玩寇於是巡撫謝杲言自天順四年以來諸苗欲劫舟溪等處不靖至今乃命鎮守太監張成總兵吳經相機勦撫二十年爛土苗賊龍洛道等攻劫舟溪等處僭號稱王且欲犯都勻清平諸衛而豐寧長官楊泰與土目楊和有隙誘廣西泗城州農民九千於鍊坑等一百餘寨殺掠苗賊愈盛弘治二年苗賊七千人攻圍楊安堡都指揮劉英統兵覘之為所困命鎮巡官往援出之五年命鎮遠侯顧溥率官兵八萬人巡撫鄧廷讚提督軍務太監江德監諸軍往征之七年諸軍進勦分路追討令熟苗詐降於賊首也富架長脚等誘令入寇伏兵擒之直擣其巢凡破一百十餘寨以捷聞於是始開設都勻府及獨山麻哈二州如前制焉



正德三年都勻長官司吳欽與其族吳敏爭襲相仇殺鎮巡以聞兵部驗貼黃言欽之祖賴洪武間立功爲長官陣亡子琮幼而以弟貴借職及琮長仍襲傳至欽三世矣敏不得以貴故安爭詔可之嘉靖十五年平浪叛苗王聰攻奪凱口圍執參將李佑等初王阿向之先世爲土官王仲武之先以計奪之遂爲世仇至阿向復與仲武爭印恃強煽亂總兵楊仁巡撫陳克宅平之斬阿向等盡逐其黨以地屬都勻府改名滅苗鎮仲武因諸苗失業陰爲招復旋科索之諸苗不勝怨遂推阿向餘孽王聰王佑爲王巡按楊春芳遣人撫諭賊質李佑等乞還土田官印乃釋佑春芳以聞迺詔巡撫復調官軍三萬人集囤下囤故絕險曩阿向卽要害處置弩樓壘石

爲防攻之三月不克至是聰等復奪而據之乃復調宣慰安萬銓兵合勦萬銓力戰破賊聰等皆伏誅前後斬首二百六十餘級降苗寨一百五十餘男婦二萬餘口捷聞敘功賞有差又有黑苗種曰天漂者在湖貴川廣界與者亞鼎足居亞亦生苗前此未內屬萬曆六年天漂請內附都御史遣指揮郭懷恩及長官金篆往問狀而阻於者亞乃遠從丹彰間道通天漂會苗坪黨銀等亦以格於者亞不得通都御史王緝新赴官使使簿責者亞部長阿斗斗願歸附平定都御史謂斗故養善牌部何故欲屬平定必有主謀者下吏按驗果得實蓋欲往平定借諸蒙兵襲養善其謀皆漢民天金貴等導之遂治金貴以者亞仍屬養善牌路遂通於是苗坪天漂皆

請奉貢賦比編氓名其地曰歸化隸都勻府凡使命往來自生齒以上悉跪拜送使者至平定夾騶從行前吹蘆笙唱蠻歌呼道而馳事聞帝嘉之七年者亞阿斗伏誅乃罷樂平吏目加麻哈州州判一人令居樂平司以養鴛者亞羊腸諸苗屬之初者亞阿斗反答干寨阿其應之斗誅阿其屢犯寨十四年土舍吳楠王國聘慮阿其叵測禍及已請以答干雞賈甲多諸寨屬蒙詔立宣威營歲輸賦獨阿其不服引者亞殘苗圍宣威營大譟曰此我地誰令爾營此乎蒙詔常徵秋稅阿其度使至以血釁門令勿通居常張繖鼓角繪龍鳳器遂與雞賈甲多仰枯諸苗擊牛酒為誓劫歸化官兵不敢近獨山土吏蒙天眷願以兵進勦乃使人佯言漢已黜蒙詔令以

宣威營地還阿其旦暮撤兵去矣阿其乃親馳樂邦牛場訶視言人人同遂弛備天眷驟入斬阿其雞賈甲多皆降其屬蒙詔者自答干雞賈甲多外有塘蛙當井斗坡等十七寨小橋熟苗龍木恰視寨事年老子倖襲頒糧者遂不及恰恰輒奪俸之有以為養倖訴於官官逮問恰非罪之也恰輒鎖漢使已而逐之曰速去此我家事再來我當以烏難諸寨踐漢邊矣官以計擒之死獄中無何龍化龍羊山引川苗攻孟漢焚其邑曰漢無故殺苗苗請報之官軍戰不利既而都司蔡兆吉招諭令降待以不死於是諸苗皆散倖視事如故四十二年平州長官楊進雄兇惡土人苦之雄無子以兄繼祿子珂為後既生子治安而疎珂珂怨雄雄乃奪其財產并父子

逐之。珂頗得民心。遂爲亂。據唐宿國。攻雄。雄敗走。屠其家。各上疏許。詔推問。都御史趙鈺以雄不法逮之獄。檄獨山土酋蒙繼武。諭珂歸。命許改土爲流以安之。治安計不便。乃陰許以六洞賂繼武。借兵。繼武乃發兵攻珂。復平州。珂走廣西之泗城。繼武遂屯耕六洞地。六洞民不服。復助珂與繼武相攻。珂復據平州。巡撫吳岳招降其父繼祿。六洞遂安。先是弘治中。清平部苗有阿溪者。素桀驁。有知其養子阿刺多力。以故橫行苗中。又善以賂結官府左右。巡撫孔鏞按部至。欲擒之。中官及守帥皆爲溪解。鏞卒以計收誅之。清平以平。平越古黎峨里。元爲平月長官司。洪武十四年置衛。十七年改爲軍。民指揮使司。屬四川萬曆中。始置府屬貴州。領州一。

曰黃平。卽黃平安撫司地。領縣四。曰平越。曰湄潭。曰甕安。卽甕水草塘。二長官司地。曰餘慶。卽白泥餘慶。二長官地。領長官司一。曰揚義。初洪武八年。貴州江力江松刺回四十餘寨。苗把具播共桶等。連結苗獠二千作亂。平越安撫司乞兵援。命指揮同知胡汝討之。九年。黃平蠻獠都麻堰亂。宣撫司捕之不克。千戶所以兵討之。亦爲所敗。乃命重慶諸衛合擊大破之。平其地。十九年。平越衛麻哈苗楊孟等聚衆作亂。命傅友德平之。時麻哈長官宋成陣歿。命其子襲。二十二年。察隴牛場乾溪苗亂。傅友德平之。二十三年。命延安侯唐勝宗往黃平平越鎮遠貴州諸處。訓練軍士。提督屯田。相機勦寇。正統末。鎮遠蠻苗金臺。僞稱順天王。與播州苗相煽亂。遂圍平。

越新添等衛半年。城中糧盡，官兵逃者九千餘人。貴州東路閉時，王驥征麓川，回師去不之顧。景泰元年，乃命保定伯梁瑄、佩平蠻將軍印督師勦之。十二月，瑄大破賊，平八十餘寨，擒賊首王阿同等。平越諸衛圍乃解。二年，都御史王來奏貴州苗王韋同烈聚興隆之截洞，復攻平越清平等衛。梁瑄自沅州發兵由東路，都督方瑛由西路，合兵與隆擊破之。同烈退保香鑪山，又調瑛由龍場，都督陳友由萬潮山，都督毛福壽由重安江，攻破黎樹翁滿等三百餘寨，斬三千餘級。招撫衮水等二百餘寨，合兵香鑪山下，衆縛同烈降。械至京，因罷兵。五年，副總兵李貴奏黎從等寨賊首阿拏王、阿傍、苗金虎等偽號苗王，與銅鼓諸賊相應，乞加兵。七年，巡撫蔣琳奏勦

苗賊於平越，斬四百餘級。其阿傍等據車梳寨，仍爲亂。於清平平越地方，殺指揮王杞，據香鑪山掠偏橋。正德十一年，乃命巡撫秦金勦之。初，貴州湖廣之交，羣苗嘯聚，連寨相望，而香鑪山周迴四十里，高數百尋，四面陡絕，其上平行，向爲叛苗巢穴。及是，阿傍等據之，糾諸寨苗作亂。巡撫鄒文盛總兵官李昂等分漢土兵爲五，克其前柵，乃密遣入援崖先登，殺賊守路者，衆蟻附而上，焚賊巢，擒阿傍，餘賊猶堅守不下。參將洛忠等詭言招撫，乃自山後擊而殲焉。遂移師龍頭、黎蘭等寨，悉破之。賊遂平。天啓四年六月，凱里土司楊世慰叛，合安邦彥兵與平茶羣苗來修怨，復窺香鑪山，搖動四衛，梗塞糧運。總督楊述中檄總兵魯欽馳至清平，相機進勦，而調副

使顏欲章等爲後援。欽督將領攻破巖頭。分造朗溪司田景祥。截平茶賊。援用藥弩及砲。殺傷賊衆。賊乘夜遠遁。自是不敢再窺鑪山。四衛得安。

石阡。本思州地。永樂十一年。置府隸貴州。領長官司四。曰石阡。曰苗民。曰葛彰。葛商。曰龍泉坪。宣德六年。葛彰葛商長官安民奏。前以官鈔糴糧儲備。令蠻民守視。緣溪洞險僻。無所支用。恐歲久腐爛。賠納實難。請以充有司祭祀。過使廩給之用。從之。萬曆中。改龍泉坪爲縣。

新添衛。故麥新地也。宋時克麥新地。乃改爲新添。元置新添葛蠻安撫司。洪武四年。置長官司。二十三年。改爲衛。二十九年。置新添衛軍民指揮使司。領長官司五。曰新添。曰小平。伐。

曰把平寨。曰丹平。曰丹行。洪武五年春。新添安撫宋亦憐真子仁來朝。其秋。平伐蘆山。山木等峇長來降。七年。平伐谷霞谷浪等苗。攻劫的敖諸寨。指揮僉事張岱討之。岱攻谷峽刺向關破之。追至的敖大破之。擒的令的若而還。蠻大讐。永樂二年。置丹行丹平二長官。宣德元年。新添土舍宋志道糾洞蠻肆掠。蕭授討擒之。九年。丹行土舍羅朝煽誘寨長卜長。逃民羅阿記等。侵占臥龍峯長官龍保地。又攻孫平寨。焚劫時苗民。素憚指揮李政。尚書王驥因奏。遣政往撫諭。從之。景泰二年。苗賊有在新添行劫。聚於西廬者。官軍破之以聞。成化九年。以旱災免新添衛糧。萬曆三十四年。貴州巡撫郭子章討平貴州苗。斬獲苗長吳老喬阿倫阿皆等十二人。招降男。

婦甚衆。先是東西二路苗名曰仲家者。盤踞貴龍平新之間。爲諸苗領袖。在水硯山。介於銅仁思石者。曰山苗。紅苗之羽翼也。窺黔自平播後。財力殫竭。有輕漢心。經年剽掠無虛日。子章奏討之。命相機進兵。子章乃命總兵陳璘。參政洪澄源。率官軍五千。益以土兵五千。攻水硯山。監軍布政趙健。率宣慰土兵萬人。使遊擊劉岳等督之。及兩路會師。皆九十餘日而克。二寇旣平。乃專命總兵陳璘。率漢土兵五千。移營新添。進攻東路苗。不一月復克。其六箐諸苗盡平。

金筑安撫司。洪武四年。故元所司。安撫密定。來朝貢馬。詔賜文綺三匹。置金筑長官司。秩正六品。隸四川行省。以密定爲長官。世襲。十四年。敕勞密定曰。西南諸部雖歸附。然暫入貢

而已。爾密定首獻馬五百匹。以助征討。其誠可嘉。故遣特使往諭。俟班師之日。重勞爾功。陞金筑長官司。爲安撫司。以密定爲金筑安撫。仍予世襲。十六年。密定遣使來朝貢方物。十七年。禮部言。金筑安撫司。進賀表牋過期。帝命宥之。十八年。密定遣弟保珠朝貢。二十九年。以金筑安撫司。隸貴州軍民指揮使司。永樂初年。金筑安撫得琛來朝。賜絨錦文綺。六年。金筑安撫得珠貢馬。洪熙元年。復貢馬。宣德元年二年。皆入貢。十年。改金筑安撫司。屬貴州布政司。正統五年。金筑安撫金鏞。遣頭目王暄。來朝貢馬。成化十九年。安撫金懋進貢。弘治二年。金筑安撫司。土舍金福慶朝貢。隆慶四年。金筑安撫司。來朝貢馬。萬曆四十年。吏部覆。巡撫胡桂芳奏。金筑安撫

土舍金太章。乞改土為流。已經議行。設官建治。欽定州名。鑄給印信。應改州判為流官。而以太章授土知州。仍予四品服色。不許管事。子孫承襲。州治屬貴陽府管轄。從之。遂改金筑安撫司為廣順州。

列傳一百九十

明史藁

列傳第一百九十終

明史藁

列傳第一百九十一

光祿大夫。經筵講官明史總裁戶部尚書加七級臣王鴻緒奉敕編撰

廣西土司一

桂林

柳州

慶遠

平樂

梧州

潯州

南寧

桂林。自秦置郡。漢始安。唐桂州。天寶改建陵。宋靜江府。元靜江路。明初改桂林府。為廣西布政使司治所。屬內地。不當列於土司傳。然廣西惟桂林。與平樂潯州梧州。未設土官。而無地無獠獞。桂林之古田。平樂之府江。潯州之藤峽。梧州之岑

溪皆煩統兵大征而後克。卒不能盡草薶而獸獮之。設防置戍。世世爲患。是亦不得而略焉。洪武七年。永道桂陽諸州蠻竊發。命金吾右衛指揮同知陸齡率兵討平之。二十二年。富川縣逃吏首賜糾合賊盤大孝等爲亂。殺知縣徐元善等。往來劫掠。廣西都指揮韓觀遣千戶廖春等討之。擒殺大孝等二百餘人。觀因言靈亭鄉乃獠蠻出入之地。雖征勦有年。未盡殄滅。恐復有構亂者。宜以桂林等衛羸餘軍士置千戶所鎮之。詔從其請。二十七年。全州灌陽等縣平川諸源獠民聚衆爲亂。命湖廣廣西二都司發兵討之。擒殺千四百餘人。諸獠奔竄遁去。置灌陽守禦千戶所。初灌陽縣隸湖廣。因廣西平川等三十六源獠賊作亂。攻擊縣治。詔寶慶衛指揮孫宗

總兵討平之。縣丞李原慶因奏灌陽去湖廣遠。隸廣西近。遂以灌陽隸桂林府千戶所。命廣西都指揮同知陶瑾領兵築城守之。永樂二年。總兵韓觀奏潯桂柳三郡蠻寇黃田等累行劫掠。殺擄人畜已調都指揮朱輝追勦。斬獲頗多。尋蒙遣官齎救撫安。其黃田等獠皆已向化。悉歸所擄人畜。帝命觀復業者。善撫卹之。宣德六年。都督山雲奏廣西左右兩江設土官衙門大小四十九處。蠻性無常。讐殺不絕。朝廷每命臣同巡按御史三司官理斷。緣諸處皆是瘴鄉。兼有蠱毒。三年之間。遣官往彼。死者凡十七人。事竟不完。今同衆議。凡土官衙門軍務重事。徑詣其處。其餘爭論詞訟。就所近衛理之。詔從其議。景泰五年。廣西古丁等洞賊首藍伽韋萬山等糾合

蠻類劫掠南寧上林武緣等地方。鎮守副總兵陳旺以聞。詔令總督馬昂等勦捕之。初桂林古田獞種甚繁。最強者曰韋。曰閉曰白。而皆并於韋。賊首韋朝威據古田。縣官竄會城。遣典史入縣撫諭。烹食之。弘治間大征。殺副總兵馬俊。參議馬鉉。正德初再征。殺通判知縣指揮等官。嘉靖初。又再征。殺指揮舒松等。時銀豹與其從父朝猛攻陷洛容縣。遷據古田。分其地爲上下六里。銀豹出掠。挾下六里人從行。而上六里不與焉。嘉靖四十五年。提督吳桂芳。因以其間。遣典史廖元入上六里撫諭之。諸獞復業者二千人。銀豹度勢孤。請降。久之復猖獗。嘗挾其五子。據鳳凰連水二寨。襲殺昭平知縣魏文端。更自永福入桂林。劫布政司庫。殺署事。參政黎民衷。縋城

而去。官軍追不及。久之臨桂永福各縣兵羣起捕賊。始得賊黨扶嫩土婆顯等三十餘人。於各山寨中。時首惡猶未獲。隆慶三年。朝議以廣西專設巡撫。推江西按察殷正茂爲僉都御史。以往。正茂至奏。請勦賊。合土漢兵十萬。集衆議。時八寨助逆。衆議先勦。敕書亦有先平八寨。徐圖古田之語。正茂獨不謂然。先給榜諭八寨。八寨聽命。然後分兵七哨。以總兵俞大猷統之。而使副總門崇文。參將王世科。黃應申。都司董龍。魯國賢。遊擊丁山等。各領一哨。復分土兵爲二隊。更番清道。必先清數里而後行。及至其巢。則合營而攻之。遂生擒朝猛。梟於軍陣。斬七千四百六十餘級。俘獲男女千餘口。銀豹窮蹙。擇肖已者。斬首獻捷。聞旣而生縛銀豹。并其子扶枝膠。俘

至京斬之。古田平。乃并八寨。與龍哈哂咳爲十寨。立長官司。以黃昌等爲之。而敕蕭紳陸雲騰充土舍名目。聽守禦調度。更陞古田縣。爲永寧州。永寧獞韋狼婁。與其黨黃銀成。有隙相仇殺。常安巡檢欲窮治之。狼婁遂與右江荔浦山灣諸獞稱亂。命指揮徐民瞻兵捕之。民瞻伏兵執狼婁。而諸獞大訐。總制殷正茂巡撫郭應聘。乃檄徵田州向武都康諸土兵。屬參將王瑞進勦。斬廖金鑑。廖金蓋。韋銀花。韋狼化等。萬曆六年。總制凌雲翼巡撫吳文華大征河池哂咳北三諸獞。斬首四萬八百餘級。嶺表悉平。

柳州。置自唐貞觀中。明初移治於馬平。所屬州二縣十。內屬千餘年。惟上林縣尚爲土官。而賓象融羅諸獞蠻。蟠結爲寇。盜城外五里。卽賊巢。軍民至無地可田。後屢加征勦。置土巡檢於各峒隘。稍稱寧焉。洪武二年七月。中書省臣言。廣西諸峒雖平。宜遷其人入內地。可無邊患。帝曰。溪洞蠻獠雜處。其人不知禮義。順之則服。逆之則變。未可輕動。今惟以兵分守要害。以鎮服之。俾日漸教化。則自不爲亂。數年之後。皆爲良民。何必遷也。永樂七年正月。柳州道村寨蠻寇韋布黨等作亂。都指揮周誼率兵討擒之。命斬布黨。梟其首於寨。三月。廣西洞蠻韋父融州羅城洞蠻潘父恭各聚衆爲亂。柳州等衛官軍捕斬之。九年。賓州遷江縣。象州武仙縣。古逢等洞蠻獠作亂。詔發柳州南寧桂林等衛兵討之。十四年。融州獞民作亂。官軍討平之。十七年。象州土吏覃仁用言。其父景安。故元

時嘗任本州巡檢。有兵獍二百人。今皆爲民。請收集爲軍。帝不許。十九年。融縣蠻賊五百餘人。羣聚剽掠。廣西參政耿文彬。率民兵會桂林衛指揮平之。柳州等府。上林等縣。獍民梁公竦等六千戶。凡男女三萬三千餘口。及羅城縣土酋韋公成乾等三百餘戶復業。初。韋公等作耗。獍民多入山谷。與之相結。事聞。遣御史王煜等招撫復業。至是俱至。仍隸籍爲民。宣德初年十一月。總兵官顧興祖討蠻寇覃公旺。殺之時。寇據思恩縣大小富龍三十餘峒。固守險阻。以拒官軍。興祖等督兵分道攻之。斬公旺并其黨千五十餘人。捷至。帝曰。蠻民亦朕赤子。殺至千數。豈無脇從非辜者乎。以後宜開示恩信。撫慰而降之。如賈琮戍交州可也。元年。柳州獍首韋敬曉

等歸附。二年。廣西三司奏。柳慶等府賊首韋萬黃韋朝傳等聚衆劫殺爲民害。敕興祖進兵勦平之。懷遠爲柳州屬邑。在右江上游。旁近靖綏黎平諸獍竊據久。隆慶時。大征古田。懷遠知縣馬希武欲乘間築城。召諸獍役之。許犒不與。諸獍遂合繩坡頭板江諸峒。殺官吏反。總制殷正茂請勦。遣總兵官李錫參將王世科統兵進討。會長安鎮諸賊獍。治舳艫百艘。入石棋傘頭諸村。官兵至板江。自東崖直擣懷遠。會大雨雪不能進。有村人朱萬世得縣印來獻。而獍賊皆據險守。正茂知諸獍獨畏永順鈎刀手及狼兵。乃檄三道兵數萬人。擊太平河裏四港牙寨槁黃大池。是江濤諸村大破之。連拔數寨。斬賊首榮才富吳金田等。前後捕斬凡三千餘。俘獲男婦及

牛馬無算。事聞。議設兵防。改萬石宜良丹陽。爲土巡司。屯土兵五百人。且耕且守。故事東蘭南丹那地。歲出土兵三千人。更番戍會城。自古田發難後。議改思恩鎮安田州。而思恩以旣戍。梧不宜重戍。因改鎮安及湖潤爲一年。思恩及田州江州上。映下雷爲一年。年出兵三千人。以四年戍桂林。而泗城及歸順都康爲一年。向武奉議及上林爲一年。思明及思州邊隆峒爲一年。龍英及忠州爲一年。年出兵四千人。以五年戍梧州。萬曆元年。洛容知縣邵廷臣以養歸。主簿謝漳行縣事。會上元夜。單騎巡徼萬山中。獞蠻韋朝義統上油古底諸獞。夜半出掠逐漳。追至城殺漳。奪縣印去。是夜指揮朱昌胤。土巡檢韋顯忠。共提兵決戰。斬首三十一級。兵校文斌獲

朝義等。奪還縣印。守巡官以聞。乃命總兵李錫。參將王瑞康。仁等勦之。破上油古底諸寨。斬覃金狼陶狼金等二千八百三十餘級。俘二百二十餘人。牛馬器械稱是。後殘獞黃朝貴。覃金磊等。復合融縣。徭號萬人。聲言欲入富福鎮。而王世科復引兵擊之。斬黃鼎等五十餘人。始洛容在萬山中。城小無雉堞。縣官皆寓府城。以爲治。舊知縣余涵。請遷城於白龍巖。不果。至是謝漳遂及於難。馬平獞韋王朋初平。馬平時因建營堡。使土舍韋志隆。提兵往屯其地。王朋視堡兵如仇讐。常率東歐大產諸蠻。要挾營堡。兵備周浩。使千總往撫。遂殺千總劫村落。總兵王尚父。統兵勦平之。

慶遠秦象郡。漢交趾日南二郡界。後淪於蠻。唐始置粵州。天

寶初改龍水郡屬嶺南道乾符中更宜州宋陞慶遠軍節度咸淳初改慶遠府元爲慶元路洪武元年仍改慶遠府時征南將軍楊文旣平廣西二年行省臣言慶遠府地接八番溪洞所轄南丹宜山等處宋元皆用其土酋安撫使以統之天兵下廣西安撫使莫天護首來款附宜如宋元制錄用以統其民則蠻情易服守兵可減帝從之詔改慶遠府爲慶遠南丹軍民安撫司置安撫使同知副使經歷知事各一員以天護爲同知通判王毅爲副使三年四月廣西行省臣言慶遠故府也今爲南丹軍民安撫司雖統地十有七州然其地皆深山曠野其民皆安撫莫天護之族天護素庸弱不能御衆而宗族強者動肆跋扈至於殺河池縣丞蓋讓與諸蠻相煽

爲亂此豈可姑息以貽禍將來乞罷安撫司而復設慶遠府置衛以守其地庶幾民知有府之治而不敢恣蠻知有兵之重而不敢亂詔從之改慶遠安撫司爲慶遠府命莫天護赴京七年賜廣西土官莫金文綺六匹莫交衣一襲置南丹州隸慶遠府以莫金爲知州八年四月那地縣土官羅貌來朝以貌知縣事二十六年罷荔波縣儒學時本縣言自洪武十七年詔置縣治其地界於雲南因蠻寇作亂焚燬學舍其後大軍克復雖已重建然生員皆獐狍馱舌之徒教養無成不堪選貢徒費民供無益國家乞罷其學從之二十八年都指揮韓觀率兵捕獲宜山等縣蠻寇二千八百餘人斬僞大王韋召僞萬戶趙成秀韋公旺等傳首詣京師時嶺南盛暑官

軍多病瘴。帝命觀班師。還軍廣西。八月廣西布政司言。南丹土官莫金叛。帝命征南將軍楊文。征龍州後。往討南丹。奉議等處。九月。龍州趙宗壽來朝。謝罪貢方物。大軍進征。奉議文調參將劉真。領兵分道攻南丹。十一月。參將劉真等。攻被南丹州。執土官知州莫金。併俘其衆。後遣寶慶衛指揮孫宗等。分兵擊巴蘭等寨。蠻獠懼。焚寨遁去。官兵追捕斬之。蠻地悉定。詔置南丹奉議慶遠三衛。以官軍守之。二十九年。廣西布政司言。新設南丹奉議慶遠三衛。及富川千戶所。歲軍餉二十餘萬石。有司所徵。不足以給。帝命俱置屯田。給耕種。尋遣中使。至桂林等府。市牛給南丹奉議等衛軍士。廣西都指揮姜旺童勝。率兵抵慶遠思恩縣鎮寧等村洞。殺獲叛蠻三千

餘人。降一千一百四十三戶。以所得故宋太平興國六年銅印一來上。永樂二年。慶遠府言。忻城宜山二縣洞蠻陳公宣等。出沒爲寇。請發兵勦捕。帝命都指揮朱輝。親往撫諭。至是輝言。公宣等相率從化。凡千三十五戶。是年。荔波縣民覃真保言。縣自洪武至今三十餘年。人民安業。惟八十二洞獠民未隸編籍。今聞朝廷加恩撫綏。咸願爲民。而無由自達。乞遣使招撫。帝從之。命右軍都督府。移文都督韓觀。遣人撫諭。其願爲民者。官量給賜資。復其徭役。三年。宣德五年。總兵官山雲。出師討慶遠蠻寇。斬首七千四百平之。九年。山雲奏。思恩縣蠻賊覃公若等。累年作亂。今委都指揮彭義等。率兵勦捕。斬賊首覃公若梁公成潘通天等。梟之要路。仍督官軍搜捕。

餘黨帝嘉之。賜敕慰勞焉。又奏慶遠鬱林等州縣蠻寇出沒。必用勦除。而兵力不足。帝命廣東都司調附近屬衛所精銳士卒千五百人。委都指揮一員赴廣西聽雲調用。十年。南丹土官莫禎來朝貢馬。賜綵幣。正統四年禎奏。本府所轄東蘭等三州土官所治。歷年以來。地方寧靖。宜山等六縣流官所治。溪峒諸蠻。不時出沒。原其所自。皆因流官只能撫字附近良民。而谿洞諸蠻恃險為惡者。不能鈐制。及其出沒。調軍勦捕。而各縣居民與諸蠻結納者。又先漏洩軍情。致賊潛遁。及聞招撫。詐為向順。仍肆劫掠。是以兵連禍結。而無寧歲。臣竊不忍良民受害。願授臣本州土官知府流官總理府事。而臣專備蠻賊務。將谿洞諸蠻積年為害者。擒捕殄絕。其餘則編

伍造冊。使聽調用。據巖險者。拘集平地。使無所恃。擇有名望者。立為頭目。加意撫恤。督勵生理。各村寨皆置社學。使漸風化。或三十里。或五十里。設一堡。使土兵守備。凡有寇亂者。即率眾勦殺。如賊不除。地方不靖。乞究臣誑罔之罪。帝覽其奏。即敕總兵官柳溥曰。以蠻攻蠻。古有成說。今莫禎所奏。意甚可嘉。彼果能効力。省我邊費。朝廷豈惜一官乎。爾其酌之。弘治九年。總督鄧廷瓚言。廣西猺獞數多。流官土民數少。兼各衛軍士。十八八九。凡有征調。全倚土兵。乞令東蘭州土官知州韋祖鉉次子一人。領土兵三五百人。至古田蘭麻等處。撥田耕守。候克平古田。因改設長官司。以授之。廷議以古田密邇省治。其間土地多良。民世業。若以祖鉉子為土官。恐數年

之後良民田稅皆非我有欲設長官司只可於土民中選補
九月廷瓚言慶遠府天河縣舊十八里後漸為獍賊所據止
餘殘民八里請分設一長官司治之兵部覆奏增設永安長
官司授土人韋萬妙為正長官韋全保韋公利覃應填為副
長官并流官吏目一員是年裁忻城縣流官留土官知縣掌
印管事亦從廷瓚奏也十二年韋祖鋌率兵五千助思恩岑
濬攻田州殺掠男女八百餘人驅之溺水死者無算遂據兼
州副總兵歐磐詣田州兵乃解嘉靖二十七年詔那地州土
官男羅廷鳳聽調有勞就本處襲替免赴京四十二年提督
張臬奏勦平猺寇功准東蘭州土官韋應龍那地州土官男
羅思輔實授本職慶遠領州四河池於弘治中從縣陞州為

流官其東蘭那地南丹皆土官縣五忻城土官又長官司二
曰永安永順

東蘭州在府城西南四百二十里宋時有韋君朝者居文蘭
峒為蠻長依綏南砦家焉傳子宴開崇寧五年內附因置蘭
州以宴開知州事俾世其官元改為東蘭州韋氏世襲如故
洪武十二年韋富撓遣其家人韋錢保詣闕上故元所授印
貢方物錢保匿富撓名以為己物因以保知東蘭州既而保
徵暴急民不堪命借富撓作亂廣西都司討平之為言其故
於是執錢保罪之以地隸慶遠府仍歸韋氏世襲
那地州在府城西南二百四十里宋熙寧初土人羅世念來
降授世襲崇寧五年諸蠻納土遂置地那二州以羅氏世知

地州。大觀中。析地州置孚州。元仍為地那二州。洪武元年。羅黃貌歸附。詔省那入地。改為那地州。錫印。授黃貌為土官。世襲知州。以流官吏目佐之。

南丹州。宋開寶初。土官莫洪。隸內附。元豐三年。立為南丹州。管轄諸蠻。歷世承襲。元至正末。莫國麒獻圖納土。命為慶遠南丹谿洞安撫使。大德二年。改慶遠路總管府為軍民安撫司。洪武初。莫金以土地內附。授知州。世襲。以流官吏目佐之。仍隸慶遠府。後金叛。詔征南將軍楊文。率師討平之。因廢州。置南丹衛。後以其地多瘴。遷之賓州。既而蠻民作亂。復置州。以金子莫祿為知州。撫治之。

忻城。宋慶曆間。置縣隸宜州。元仍以土官莫保為八仙屯千戶。洪武初。設流官知縣。罷管兵官。籍其屯兵為民。莫氏遂徙居忻城界。宣正後。猺獠狂悖。知縣蘇寬不任職。而猺老韋公泰等。舉莫保之孫誠敬為土官。寬為請於上官。具奏得世襲知縣。由是邑有二令。權不相統。流官益無所為。握空印。儼居府城而已。弘治間。總督鄧廷瓚。奏革流官。而土人韋保為內監官。用事陰主之。始獨任土官。

永順司。永安司。舊為宜山縣。正統六年。因蠻民弗靖。有司莫能控禦。耆民黃祖記與思恩土官岑瑛交結。欲割地歸之。思恩因謀於知縣朱斌備。時瑛方雄兩江。大將多右之。斌備亦欲藉以自固。遂為具奏。將地改檄岑瑛管轄。土民不服。韋萬秀以復地為名。因而倡亂。成化二十二年。覃召管等復亂。屢

征不靖。弘治元年。委官撫之。各賊願取前地。別立長官司。以治。都御史鄧廷瓚爲奏。置永順永安二司。各設長官一副長官一。以鄧文茂彭訪韋槐韋朝和等授之。亦皆宜山洛口洛東諸里人也。自是宜山東南棄一百八十四村地。宜山西南棄一百二十四村地。議者以析城自唐宋內屬。已二百餘年。一旦舉而棄之於蠻。爲失策云。

平樂初爲縣。元大德中。改平樂府。明因之。洪武二十一年。廣西都指揮司使言。平樂府富川縣靈亭山破紙山等洞。僞二千餘人。占耕內地。嘯聚劫奪。居民被擾。恭城賀縣及湖廣道州永明等縣之民。亦被其害。比調衛兵收捕。卽逃匿巖谷。兵退復肆跳梁。臣等欲於秋成之時。統率所部。會水道諸軍。屯

駐賊境。扼其要路。收其所種穀粟。彼無糧食。勢必自窮。乘機擒戮。可絕後患。從之。二十九年。遷富川縣於富川千戶所。時富川千戶所。新立於矮石城。典史言。縣治無城。恐蠻寇竊發。無以禦之。宜遷於城內爲便。從之。弘治九年。總督鄧廷瓚言。平樂府之昭仁堡。界在梧州平樂之間。猺獞率出爲患。乞令上林縣土官知縣黃瓊。歸德土官知州黃通。各選子弟一人。領土兵各千人。駐劄本堡。仍於本堡築城。設長官司署。領撥平樂縣仙回峒閒田。與之耕種。其冠帶千夫長龍彪。改授昭平巡檢司土官巡檢。造哨船三十。使之往來府江巡哨。流官停選。廷議以昭平堡係內地。若增設土官衙門。恐貽後患。況府江一帶。近已設按察司副使一員。整飭兵備。其土官黃瓊

等不必差遣。止令每歲各出土兵一千聽調。詔從其議。府江有兩岸。三洞諸獠皆屬荔浦。延袤千餘里。中間巢峒盤絡。爲獠窟穴。江上諸賊倚爲黨援。日與府江酋長楊公滿雷公奉黃公東等奪荔浦平樂。及峰門南源。執永安知州楊惟執。殺指揮胡翰。千戶周濂。土舍岑文。及兵民無算。而遷江之北三。來賓之北五。皆右江獠。亦時時與東歐西里。及三都五都諸賊相倚附。馬多人勁。俗號爲剗馬賊。常陳兵走嶺東。掠三水清遠諸縣。還入南寧平南武宣來賓。藤貴劫府庫。已而劫來賓所千戶黃元舉。殺土吏黃勝。及其子四人。兵七十餘人。又殺明經諸生王朝經。周松。李茂。姜集等。自是之後。白晝劫殺道絕行人。隆慶六年。兩江守巡道劉穩請於巡撫郭應聘。

總督殷正茂奏討。遂以總兵官李錫爲將。督官軍進剿。并調東蘭龍英泗城南丹歸順諸土兵。而以土吏韋文明等統之。攻古西巖口笋山古造。及兩峰黃洞古摺糯洞等寨。斬獲賊渠楊錢甫黃公護等。餘黨竄入仙迴古帶諸山。搜捕殆盡。乃移檄北三北五。趣其歸降。會峒老韋法真。同原擄來賓遷江民。蒙演蒙葛眉詣軍前乞降。許之。乃爲定善後六策。以聞。前是荔浦之峰門南源。修仁之麗壁。永安之古眉。諸巡司爲諸獠所奪。至是議改土巡檢。推擇有才武者。給冠帶管事。滿三載。稱職始世襲。萬曆六年。北山蠻譚公柄挾毒弩肆傷行旅。每一出。十百爲羣。殺土吏黃勝。復聚黨韋三層韋三丈等。以二千人出合鳳山龜鼈塘。與河塘韋宋武。傍江結寨。時義寧

咳其下增建二堡。百楊渡水爲界。盡作墾屯。給南丹衛。通道慶遠賓州。使思恩三里。聯絡不絕。於是右江十寨皆安戢。輸賦如故。三十二年。桂林平樂。猺獞據險肆亂。殺知縣張士毅。傷百戶曹恩。焚劫歲無虛月。總督應檟。檄總兵官顧寰。督兵進勦。凡擒斬四百八十四。俘獲男女三百四十。牛馬器械甚衆。守臣以捷聞。竝上僉事茅坤。參將王寵。都指揮鍾坤秀。參政張謙。百戶吳通等功狀。帝嘉諸臣勞績。各陞廕有差。平樂界桂梧。西北近楚。清湘九疑。鬱相膠結。東南入梧溪峒。林樾多爲猺人盤據。自數經大征後。刊山通道。展爲周行。而又增置樓船。繕修校壘。居民行旅皆帖席。猺獞亦駸駸馴習於文治云。

梧州。漢之蒼梧郡也。元至元中。改置梧州路。洪武元年五月。征南將軍廖永忠。參政朱亮祖等。旣平廣東。引兵至梧州境。元達魯花赤拜住。率官吏父老迎降。已亮祖駐兵藤州。於是潯貴等州縣。以次降附。二年九月。併南流縣於鬱林州。普寧縣於容州。并藤州隸梧州府。四年四月。置梧州府守禦千戶所。二十三年。置容縣守禦千戶所。萬曆初。岑溪潘積善。僭號平天王。與六十三山六山七山諸猺獞。據山爲寇。居民請勦。會大兵征羅旁。不暇。及總制凌雲翼。先以檄曉積善。積善願歸降輸賦。乃貸其死。且以其子入學。當是時。七山爲蒼藤信地。六山爲容縣北流中衝。北科爲六十三山咽喉。懷集爲賀縣諸村出入之所。因立五大營。營六百人。合得三千人。設參

將及屯堡三十治焉。而懷集猺嚴秀珠與車廷惠諸酋。雄據十五寨。環二百餘里。屢為州縣患。正德中。官軍屢討之。歸降。然盤互如故。往往相結。諸峒蠻劫掠。殺百戶朱裳。及把總羅定朝。時村民皆畏秀珠。東西遁走。都御史吳善檄總兵戚繼光徵官兵。及羅定泗城都康諸土兵。分為五道。命參將戴應麟等擊金雞松柏諸寨。斬秀珠韋胡通等。撫四百餘人。時鬱林猺長黃邦緣亦桀驁。數糾諸生猺。破羅充金頂樟木諸村。入寇興業縣。兵巡道副使王原相告於總制。調兵擊邦緣。邦緣遁入巢。計擒之。諸猺悉平。廣西諸府。惟蒼梧一道無土官。而猺患亦稀。由總制開府於其地。宿重兵以制勝。居重之勢。然也。

潯州。江曰潯江。東城門曰潯陽。郡名取焉。洪武八年三月。潯州大藤峽猺賊竊發。柳州衛官軍擒捕之。二十年。知府沈信言。府境接連柳象梧藤等州。山谿險峻。猺賊出沒不常。近者廣西布政司參議楊敬恭。為大亨老鼠羅碌山生猺所殺。官軍討之。賊乃登陟巖崖。攀緣樹木。捷如猿狖。追襲不及。若久駐兵。則瘴癘時發。兵多疾疫。又難進取。及至兵退。復出為患。臣以為桂平平南二縣。舊附猺民。皆便習弓弩。慣歷險阻。若選其少壯千餘人。免其差徭。給以軍器衣裝。俾各團村寨。置烽火。與巡檢司民兵。相為聲援。協同捕逐。可以殲之。帝以蠻夷梗化。夙習固然。但當謹其防禦。使不為患耳。如為寇不已。則發兵討之。何必團寨。永樂三年。總兵韓觀奏。桂平縣蠻民

爲亂請發兵勦捕。帝命姑撫之勿用兵。宣德四年。總兵山雲討潯柳二州寇。并誅從寇二千四百八十人。梟首境上以殉。七年。總兵山雲奏斬獲桂平等縣蠻寇覃公專等首級數。帝顧左右曰。蠻寇害我良民。譬之蝨賊害稼。不可不去。然殺之過多。亦所不忍。雖彼自取滅亡。朕自以天地之心爲心也。九年。雲奏潯州等處蠻寇劫掠良民。指揮田真率兵於大藤峽等處。前後斬首九十六級。歸所掠男婦二百三人。正統元年。兵部尚書王驥奏。桂平大藤峽等處蠻寇攻劫鄉村。因調廣東官軍二千人。今已逾年。軍器衣裝損壞。宜如貴州諸軍例。予踐更。從之。二年。總兵官山雲奏。潯州府平南等縣耆民言。潯州切近大藤峽等山。猺寇不時出沒。劫掠居民。阻絕行旅。

近山荒田爲賊占耕。而左右兩江人多食少。其狼兵素勇。爲賊所憚。若選委頭目起領前來屯種。近山荒田斷賊出沒之路。不過數年。賊徒坐困。地方寧靖矣。臣已會同巡檢諸司計議。量撥田州等府族目土兵分界耕守。卽委土官都指揮黃竑領之。遇賊出沒。協同勦殺。從之。七年。潯州猺賊藍受貳等恃所居大藤峽石門山險。糾集大信等山。山老山丁。或五六百人。或三四百人。遞年殺掠。至是千戶滿智等誘殺其十人。帝命梟之家口。給賜有功之家。十一年。大藤峽蠻賊五十餘衆流劫鄉村。侵犯諸縣。巡按萬節以聞。景泰七年。大藤峽賊糾合荔浦等處賊首韋公海等。劫掠縣治。殺擄居民。命總兵柳溥等勦之。天順五年。鎮守廣東右監丞阮隨奏。大藤峽等

處。猺賊出沒兩廣。爲惡累年。邇來愈甚。雖嘗會兵勦捕。緣地里遼遠。且兩廣軍馬。不相統屬。未易成功。必大舉兵。擣其巢穴。庶絕民患。乃命都督僉事顏彪。佩征蠻將軍印。充總兵官。仍調南京江西。及直隸九江等衛官軍一萬隸之。六年正月。都督顏彪奏。臣督率官軍。進勦大藤。攻破七百二十一寨。斬首三千二百七十一級。復所掠男婦五百餘口。帝敕獎彪。七年十一月。大藤峽賊。夜入梧州城。時總兵秦寧侯陳涇。駐兵城中。會太監朱祥。巡按吳璘。副使周壽。僉事董應軫。參議陸禎。都指揮杜衡。上官都指揮岑瑛。等於城中。議調兵。夜半賊駕梯上城。涇等不覺。賊遂入府治。劫官庫。放罪囚。殺死軍民無算。大掠城中。執副使周壽爲質。殺訓導任璩。涇等擁兵自

衛。不敢發一矢。隨軍器械。并備賞銀貨等物。皆爲賊有致仕。布政宋欽時家居。挺身出。以大義諭賊。爲所害。黎明賊聲言。官軍若動。則殺周副使。涇等乃遣人與賊講解。晡時縱之出城。賊旣出。乃縱壽還。時官軍數千。賊僅七百而已。都指揮邢斌奏至。帝曰。梧州蕞爾小城。總兵守鎮。巡按三司。俱擁重兵。駐城中。乃爲小賊所蔑視。況遇大敵乎。爾兵部其卽議處行。八年四月。國子監生封登奏。廣西潯州夾江諸山。哈呀巖。峽中有大藤如斗。延亘兩崖。勢如徒杠。蠻衆蟻渡。號大藤峽。最險惡。地亦最高。登藤峽巔。數百里。皆歷歷目前。軍旅之聚散。往來可顧盼。盡諸蠻倚爲奧區。桂平大宣鄉。崇姜里。爲前庭。象州東鄉。武宣北鄉。爲後戶。藤縣五屯。障其左。貴縣龍山

據其右。若兩臂然。峽北巖峒以百計。仙人關九層崖。極險阨。峽以南有牛腸大岫諸村。皆緣江立寨。藤峽府江之間爲力山。力山之險。倍於藤峽。又南則爲府江。其中多冥巖與谷。絕壁層崖。十步九折。失足隕身。中產獠人。藍胡侯槃。四姓爲渠魁。力山又有獠人。善傳毒藥。弩矢中人無不立斃。四姓獠亦憚之。自景泰以來。嘯聚至萬人。墮城殺吏。而修仁荔浦平樂。力山諸獠應之。其勢益張。渠長侯大狗。天順中。懸千金購。莫能得。於是鬱林博白新會信宜興安馬平來賓亦煽動。所至丘墟爲民害。乞選良將。多調官軍。狼兵急滅賊。報聞。成化元年。翰林院編修丘濬條上兩廣用兵機宜。於是兵部尚書王竑奏言。峽賊稱亂久矣。皆由守臣以招撫爲功。致釀大患。非

大創不止也。因薦浙江參政韓雍。有文武才。乃以韓雍爲右僉都御史。都督同知趙輔爲征蠻將軍。和勇爲遊擊將軍。率師討之。五月。大藤峽賊三千餘陷南平縣。殺典史周誠。擄其妻子。并劫縣印。帝命進兵勦捕。十月。大藤峽蠻賊入藤縣城。掠官庫。劫縣印。鎮守總兵歐信以聞。於是總兵官趙輔率軍至。奏言。大藤蠻賊以修仁荔浦爲羽翼。今大軍壓境。宜先勦之。乃合諸軍十六萬人。分五道進。先破修仁。窮追至力山。生擒千二百餘人。斬首七千三百餘級。二年。都督趙輔都御史韓雍等奏。臣奉命討大藤峽賊。於元年十一月。師次潯州。前後延詢父老。皆云。是峽天險。一夫守隘。萬人莫前。難以進擊。莫若圍守以待其敝。臣等審度。峽之延廣。六百餘里。非有數

萬甲兵豈能圍困。乃謀深入以覆其巢。遂調總兵官歐信等分兵五哨。取道山北以進。臣及指揮白全分兵八哨直抵潯州。以擣山南。復令參將孫震分兵二哨從水路入。別遣指揮潘鐸等以兵分守諸山隘口。刻期十二月朔日。水陸竝進。腹背交攻。賊知我師至。先移妻子家屬錢穀入桂州橫石塘等處藏之。乃於山南各寨立柵自固。用輓木礮石鏢鎗藥弩。憑險旅拒。臣嚴督諸軍。用團牌扒山虎等器仗。魚貫而進。驍勇先登。士殊死戰。一日之間。斬關攻寨。其山南石門林峒沙田古營諸賊巢。盡擊破之。縱火焚其積聚。煙焰漲天。賊皆奔潰。於是跡賊所至。督兵追躡。剷山開路。直抵桂州橫石塘。及九層樓等山。層崖深箐。窮高極險之處。賊已立柵數重。復用木

石鎗弩拒守。臣等多設疑兵。誘賊拋擲木石。亂發幾盡。別遣壯士於賊所不備處。高山絕頂。舉砲為號。臣等躬率諸軍。緣木攀蘿。蟻附而上。四面夾攻。連日鏖戰。賊不能支。破賊寨三百二十四所。斬首三千二百七級。生擒七百八十二人。獲賊屬婦女二千七百一十八人。餘戰溺死者不可勝計。臣已將大藤峽改為斷藤峽。刻石紀之。以昭天討。捷聞。帝降敕褒諭。仍救輔計議長策。永絕後患。十二月。雍奏斷藤峽殘賊侯鄭昂等七百餘人。夜入潯州府城。焚軍營城樓。奪百戶所印三顆。殺掠男婦數十人。旋為參將孫震指揮張英率軍擊斬賊魁。餘黨仍奔入巢。既雍又奏諸徭之性。憚見官吏。攝以流官。終難靖亂。請改設武宣縣東鄉等巡檢司。以土人李昇等為

副巡檢設武靖州於峽內。以上隆州知州岑鐸知州事。土人覃仲英世襲土官吏。且然府江東西兩岸大小桐江洛口與斷藤峽朦朧三黃等處村巢接壤。路道崎嶇。唇齒相聯。聚眾劫掠。終不能除。正德十一年。總督陳金復督調兩廣官軍。土兵分爲六大哨行。兩廣按察使宗璽布政使吳廷舉副總兵房閏鎮守太監傅倫參將牛桓都指揮魯宗貴王英等統領水陸竝進。斬七千五百六十餘級。金謂諸蠻利魚鹽耳。乃與約商船入峽者。計船大小給魚鹽與之。諸蠻就水濱受去。如榷稅然。不得爲梗。蠻初獲利聽約。道頗通。金以此法可久。易峽名永通。久之諸蠻緣此無忌。大肆掠奪。稍不愜。卽殺之。因循猖獗。江路爲斷。時總督王守仁定田州還兩江。父老遮道。

言峽賊阻害狀。守仁上疏請討。許之。正德七年。守仁率湖南兵至南寧。時盧蘇王受初降。願立功自贖。守仁率諸將議襲峽寇。約日會兵。時寇聞湖兵且至。皆逃匿。守仁故爲散遣諸兵。狀寇弛不爲備。乃令官軍突進。連破油碎石壁大皮等寨。賊奔斷藤峽。復追擊破之。賊奔渡橫石江。溺死六百餘人。俘斬甚衆。賊潰散。搜勦無遺。遂移兵進勦仙臺花相白竹古陶羅鳳諸處。賊不支。奔入永安力山。皆次第破之。擒斬三千餘。俘獲無算。八寨平。兩江悉定。守仁遂以土官岑猛子邦佐爲武靖知州。使靖遺孽。邦佐不能輯眾。且貪得賊賄。峽北賊復獗。有侯勝海者爲亂首。指揮潘翰臣誘勝海殺之。勝海弟公丁聚眾謀城下。僉事鄔閱參議孫繼祖言於都御史潘旦。請

討之。參將沈希儀以為宜需春江漲順流下，乃可破賊，不聽。閱與繼祖以千人往擊賊，遁斬一虜寇，還漫言賊退，請置堡。堡成，閱令土目黃貴韋香以三百人戍之。初，貴香利勝海田廬，故說翰臣殺海。至是，閱復令戍，貴香遂奪勝海田廬。於是諸猺俱恚，邦佐又陰黨之。公丁遂嘯聚二千餘人，夜攻堡城，破之，殺戍兵二百人，貴香走免。巡按以聞，遂罷閱與繼祖，而旦亦代去。乃命侍郎蔡經督兵討之。十六年，經承命撫廣西，集諸司議發兵，會朝議欲征安南，事遂已。公丁等益橫，時出殺掠，潯人苦之。經乃會安遠侯柳珣決計發兵，以兵事屬副使翁萬達。萬達廉得百戶許雄，素通賊狀，詰之，雄懼，請効力自贖。萬達佯庇公丁，捕繫許訟公丁者數人。公丁果遣人自

檄疑
檄誤

列。萬達亦佯許之，又令雄假稱貸為賄。公丁喜益信雄，會萬達巡他郡，以事屬參議田汝成。汝成召雄申飭之，雄給公丁詣汝成，自列言寇堡事由他猺。汝成亦慰遣之，乃密授意城中居民被賊害者，家出毆公丁一布，皆譁游檄，并逮公丁入繫獄。遣雄諭其黨曰：寇堡事，公丁委罪諸猺，果否？諸猺遂言事自公丁。聽論坐不敢黨，乃檻致公丁於軍門，磔之。時十七年冬也。汝成乃言之督府，謂首惡既誅，宜乘此時進兵討賊。經許之，乃以副總兵張經將左軍，副使翁萬達監之，以都指揮高乾將右軍，副使梁廷振監之，以副使蕭崑紀功參政林士元及汝成督餉。以十八年二月，兩軍齊發。左軍三萬五千，人分六道，攻紫荆石門梅嶺木昂藤冲大坑等巢。右軍萬六

千人分四道攻碧灘羅淥上中下洞等巢。南北夾擊賊大窘。遂擁衆奔林峒而東。王良輔邀擊之。中斷復西奔。諸軍合擊大破之。斬首千二百級。復追至羅連山。又斬百餘級。會平南縣有小田羅應古陶古思諸徭。亦據險勿靖。萬達等移兵勦之。招降賊黨二百餘人。江南胡姓諸徭歸順者亦千餘人。藤峽復平。隆慶三年。右江諸徭復亂。巡撫郭應聘請給餉勦除之。給事梁問孟以賊黨衆不可盡滅。宜令守臣熟計。兵部覆言。府江自正德十二年。都御史陳金征討之後。且六十年。而右江北三北五等巢。素未懲創。生齒日繁。遂肆猖獗。頃者大征古田。各巢咸畏威斂戢。獨府江右江恃險爲亂。若復縱之。非惟無以固八寨懷遠之招。亦恐以啓古田攜貳之漸。勦

之便。但兵在萬全。宜卽以科臣所慮備行。提督殷正茂及廣西巡撫郭應聘等。便宜行之。應聘遂檄總兵官李錫等討平之。

南寧。唐之邕州也。元改邕州路。泰定改南寧路。洪武二年十月。命潭州衛指揮同知丘廣爲總兵官。寶慶衛指揮僉事胡海。廣西衛指揮僉事左君弼副之。率兵討左江上思州蠻賊黃龍冠等。龍冠一名英傑。時聚衆萬餘。寇鬱林州。知州趙鑑同知王彬集民丁拒守。賊圍半月不下。海北等衛官軍來援。賊夜遁。追至上思州境破之。賊走還。仍結聚不解。事聞。故命廣等討之。十二月。廣等兵至上思州。英傑拒戰。廣擊敗之。擒從賊黃權等。英傑走十萬山。復以兵追及斬之。上思州平。三

年四月。置南寧柳州二衛。時廣西省臣言。廣西地接雲南交趾。所治皆谿洞苗蠻。性狠戾多畔。府衛兵遠在靖江數百里外。卒有警難相援。乞立衛置兵以鎮。又言廣海俗素獷戾。動相讐殺。蓋緣郡縣無兵以馭之。近盜寇鬱林。同知集民兵拒之。潯州經歷徐成祖亦以民兵千餘敗賊。是土兵未始不可用也。乞令邊境郡縣長官。輯民丁之壯者。置衣甲器械。籍之於有司。有事則捕賊。無事則務農。詔從之。遂置衛益兵守禦。賞王彬徐承祖以下。有破賊功者。五年三月。宣化盜起。劫掠南寧府。詔發廣西官軍討平之。初南寧衛指揮僉事左君弼。覈民之無籍者爲軍。又縱所部入山伐木。民多擾。遂相構爲盜。至是討平。命大都督府按君弼罪。南寧故稱邕管。牂牁時

其西北。交趾踞其西南。三十六洞錯壤而居。延袤幾千里。橫山永平尤要害。歷唐及宋。建牙置帥。與桂州等。又郡地最夷曠。可宿數萬師。成化時。征田州。及經略安南。舉弭節茲土。後因猺蠻不靖。往往仗狼兵。急則藉爲前驅。緩則檄爲守禦。諸猺乃稍稍驕恣。不可盡繩以文法。議邕事者謂宜開重鎮。以復邕州督府之舊云。南寧領州四。曰新寧。曰橫州。爲流官。曰上思州。曰下雷州。爲土官。縣三。曰宣化。曰隆化。曰永淳。歸德州。宋熙寧中置。元屬田州路。洪武二年。土官黃隍城歸附。授知州。以流官吏目佐之。

果化州。宋始置。元屬田州路。洪武二年。土官趙榮歸附。授世襲知州。以流官吏目佐之。洪熙元年。果化州土官知州趙英。

遣族人趙誠等來朝貢馬及方物。弘治間，州與歸德皆為田州所侵削，因改隸於南寧。

上思州。唐始置，元屬思明路。洪武初，土官黃中榮內附，授知州。其後子孫，畔服不常。弘治十八年，以州改流官，屬南寧府。正德六年，上思州土目黃錙聚眾攻城，都御史林廷選捕之，下獄。已而越獄復叛，官軍禦之，詐降，攻破州城，復捕獲之，伏誅。嘉靖元年，都御史張嶺言：上思州本土官，後改流，遂致土人稱亂，宜仍其舊，擇土吏之良者任之，議以為然。仍以土官襲。

下雷。宋元為州。明初，印失，廢州為峒，在湖潤寨，屬鎮安府。峒長許永通調征有功，始給冠帶。傳許世烈、許國仁，繼襲峒事。

嘉靖十四年，獲舊印。國仁子宗蔭襲。宗蔭父子屢立戰功。四十二年，改屬南寧府。宗蔭死，子應珪襲。萬曆十八年，以地逼交南，奏陛下雷州，頒印授應珪，土判官吏目佐之。



明史彙

列傳第一百九十一終

375
32

續皇朝詩集
列傳二百九十一



續皇朝詩集
列傳二百九十一

